

MESYUARAT KEDUA, PENGGAL KEEMPAT
PARLIMEN KEEMPAT BELAS
2021

HARI RABU : 10 NOVEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 5, 9, 10, 14 HINGGA NO. 46)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI BUNG MOKTAR BIN RADIN
(KINABATANGAN)**

TARIKH : 10 NOVEMBER 2021 (RABU)

SOALAN

DATO' SRI BUNG MOKTAR BIN RADIN [KINABATANGAN] minta **MENTERI KANAN KERJA RAYA** menyatakan apakah pendirian pihak Kementerian dalam mengiktiraf kepakaran teknikal kakitangan Kementerian Kerja Raya Sabah bagi membolehkan peruntukan dapat disalurkan secara terus dan diuruskan sendiri oleh Kementerian Kerja Raya Sabah.

JAWAPAN

Tuan Yang Di-Pertua,

Untuk makluman Ahli Yang Berhormat, isu tersebut sebenarnya berkait dengan penguatkuasaan Arahan Perbendaharaan (AP) 182 bagi projek-projek Kerajaan Persekutuan di Sabah dan Sarawak. Sebagai rekod, AP182 antara lain telah menggariskan tentang kebertanggungjawaban dan mandat kepada JKR Malaysia dan JPS selaku Jabatan Teknik Persekutuan bagi melaksanakan semua projek pembangunan fizikal yang dibiayai menerusi peruntukan Kerajaan Persekutuan di negara ini. Ia melibatkan semua proses pelaksanaan projek; termasuklah perolehan, penentuan skop, kos projek dan lain-lain.

Kementerian Kerja Raya mengambil maklum mengenai tuntutan oleh Kerajaan Sabah dan Sarawak di mana ia acapkali dibincang sebelum ini. Perkara ini termasuk dalam salah satu agenda Rundingan Perjanjian Malaysia 1963 (MA63). Untuk makluman Ahli Yang Berhormat, pada masa kini perkara tersebut sedang diteliti oleh Jawatankuasa Kerja Rakan Sekutu iaitu salah satu Jawatankuasa yang ditubuhkan oleh Majlis Khas MA63. Keputusan daripada jawatankuasa ini akan dibawa untuk pertimbangan Majlis Khas MA63 yang dipengerusikan bersama oleh YAB Perdana Menteri, YAB Ketua Menteri Sabah dan YAB Ketua Menteri Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. SHAMSUL ANUAR BIN HAJI
NASARAH [LENGGONG]**

TARIKH : 10 NOVEMBER 2021 (RABU)

SOALAN

DATUK SERI DR. SHAMSUL ANUAR BIN HAJI NASARAH minta **PERDANA MENTERI** menyatakan usaha bagi membantu mengurangkan jurang pendapatan antara golongan bandar dan luar bandar dan sejauh mana kesan wabak COVID-19 ini mempengaruhi pendapatan golongan ini.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Pada tahun 2021, sebanyak 25.2 juta penduduk atau 77.3 peratus adalah di kawasan bandar manakala 7.4 juta penduduk atau 22.7 peratus adalah di kawasan luar bandar. Umumnya, pandemik COVID-19 memberi kesan terhadap semua isi rumah baik di bandar mahupun di luar bandar.

2. Berdasarkan Laporan Anggaran Pendapatan Isi Rumah dan Insiden Kemiskinan 2020, pendapatan isi rumah kasar purata bulanan di peringkat nasional telah menurun daripada RM7,901 kepada RM7,089 iaitu penurunan sebanyak 10.3% dalam tempoh yang sama. Secara umumnya, semua negeri mencatatkan penurunan pendapatan isi rumah

kasar penengah dan purata bulanan dan isi rumah terkesan di bandar mahupun di luar bandar.

3. Sebagai Kerajaan yang prihatin, kerajaan telah melaksanakan strategi Pemulihan Ekonomi Negara 6R dengan tumpuan untuk melindungi kehidupan rakyat, kelangsungan perniagaan dan menjana ekonomi terutama bagi mendepani pandemik COVID-19. Lapan pakej rangsangan ekonomi dengan jumlah sebanyak RM530 bilion telah diperuntukkan oleh Kerajaan bagi membantu rakyat meneruskan kelangsungan hidup dalam tempoh mencabar ini.

4. Melalui Bajet 2022 yang telah dibentangkan pada 29 Oktober 2021, Kerajaan akan melaksanakan beberapa inisiatif untuk meningkatkan pendapatan Keluarga Malaysia, di antaranya:

- i. Menjamin penyediaan 600 ribu peluang pekerjaan dengan peruntukan berjumlah RM4.8 bilion ringgit di bawah inisiatif Jamin Kerja Keluarga Malaysia (atau JaminKerja);
- ii. Inisiatif insentif penggajian JaminKerja dengan sasaran 300 ribu orang dan peruntukan RM2 bilion; dan
- iii. Pembiayaan kredit mikro bernilai hampir RM1.8 bilion akan disediakan melalui pelbagai agensi seperti TEKUN, Agrobank, BSN, Bank Rakyat dan Bank Negara Malaysia untuk membantu peniaga kecil dan sektor informal.

5. Bagi strategi jangka sederhana dan panjang Rancangan Malaysia Kedua Belas (RMKe-12), Kerajaan akan meneruskan dasar dan strategi untuk meningkatkan pendapatan dan kuasa beli serta kesejahteraan rakyat terutamanya isi rumah miskin dalam kalangan B40 di bandar dan luar bandar. Strategi ini termasuk menyediakan:

- i. Program peningkatan pendapatan serta peningkatan keupayaan contohnya Skim Kesejahteraan Rakyat;
- ii. Menambah baik akses kepada keperluan asas termasuk pendidikan, kesihatan dan perumahan;

- iii. menggalakkan keusahawanan dan akses kepada pembiayaan kewangan serta menyediakan kemudahan pembiayaan mikro seperti TEKUN; dan
- iv. meningkatkan sistem perlindungan sosial seperti Skim Peduli Kesihatan untuk Kumpulan B40 (PeKa B40).

6. Di samping itu, antara strategi yang akan dilaksanakan untuk mentransformasi kawasan luar bandar bagi merapatkan jurang pembangunan adalah:

- i. Mempercepat penyediaan infrastruktur dan perkhidmatan melalui peningkatan penyediaan infrastruktur luar bandar, menambah baik perkhidmatan asas dan mempertingkatkan ketersambungan dan mobiliti;
- ii. Mempelbagaikan dan merancakkan aktiviti ekonomi melalui inisiatif guna tanah penuh dan mencergaskan semula industri kotej luar bandar; dan
- iii. Menambah baik tadbir urus melalui memperkasa komuniti luar bandar di samping memperkemas sistem penyampaian.

7. Kerajaan yakin, inisiatif di bawah Bajet 2022 dan strategi yang dilaksanakan dalam RMKe-12 akan dapat membantu meningkatkan pendapatan dan taraf hidup Keluarga Malaysia di bandar dan luar bandar dengan komitmen semua pihak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB DATUK SERI SAIFUDDIN NASUTION BIN ISMAIL [KULIM BANDAR BAHARU]

TARIKH : 10 NOVEMBER 2021 (RABU)

SOALAN

Minta **MENTERI SAINS, TEKNOLOGI DAN INOVASI** menyatakan apakah keutamaan R&D, bidang keutamaan eksport dan bidang pemfailan paten negara pada masa kini.

JAWAPAN

Tuan Yang di-Pertua,

Terima kasih kepada Ahli Yang Berhormat Kulim Bandar Baharu atas soalan ini.

KEUTAMAAN R&D

Untuk makluman Yang Berhormat,

Keutamaan projek penyelidikan dan pembangunan (R&D) yang dibiayai MOSTI adalah kepada **pembangunan eksperimental**, kerana ia lebih praktikal, spesifik dan dapat menjana pulangan ekonomi dalam jangka masa pendek.

Oleh yang demikian, MOSTI telah **menyusun semula** skim pembiayaan Dana R&D di bawah Kementerian ini mulai RMKe12. Bermula tahun ini juga, MOSTI telah mula melaksanakan pendekatan baharu dengan menyediakan pembiayaan atau menyalurkan dana kepada projek R&D

berdasarkan Rangka Kerja Malaysia Sains, Teknologi, Inovasi dan Ekonomi (MySTIE) 10-10.

Antara kategori dana yang ditawarkan adalah seperti berikut:

1. *Applied Innovation Fund* (AIF);
2. *Technology Development Fund 1* (TeD 1);
3. *Technology Development Fund 2* (TeD 2);
4. *Bridging Fund* (BGF);
5. *Strategic Research Fund* (SRF); dan
6. *MOSTI Combating COVID-19 Fund*.

Untuk makluman juga, penyaluran dana ini telah diperluas akan skop penerimaannya kepada syarikat *startup*, politeknik dan kolej komuniti, *multinational companies* (MNC) dan juga *large companies*.

Keutamaan pembiayaan dana tersebut juga, akan memberi fokus kepada projek R&D yang berkaitan dengan teknologi asas Revolusi Industri 4.0 (IR 4.0) dan transformasi digital.

Selain itu, tumpuan juga ditingkatkan terhadap pembangunan infrastruktur digital dan teknologi disruptif yang menjadi nadi utama bagi kelangsungan ekosistem *startup*, pembiayaan dan pembangunan bakat.

BIDANG KEUTAMAAN EKSPORT

Seterusnya bagi menjawab persoalan mengenai bidang keutamaan eksport negara, pada 25 Oktober 2021, Yang Amat Berhormat Perdana Menteri telah melancarkan Rangka Tindakan Perdagangan Nasional atau *National Trade Blueprint* bagi tahun 2021 hingga 2025.

Rangka Tindakan ini bertujuan untuk mengenal pasti sektor-sektor utama eksport barang dagangan, berdasarkan analisis kapasiti eksport dan permintaan dunia, yang meliputi enam (6) produk, iaitu:

1. Elektrik & Elektronik;
2. Optik dan peralatan saintifik;
3. Produk petroleum;

4. Produk kimia dan bahan kimia;
5. Peralatan pengangkutan; serta
6. Mesin dan peralatan.

Sebagai contoh, produk Elektrik dan Elektronik atau E&E merupakan penyumbang terbesar eksport negara pada tahun 2020, dengan jumlah nilai eksport adalah 386.29 bilion ringgit atau 39.3 peratus daripada keseluruhan eksport negara. Ini merangkumi produk eksport E&E seperti semikonduktor, litar bersepadu elektronik, peralatan telekomunikasi serta mesin pemprosesan data automatik dan alatan.

BIDANG PEMFAILAN PATEN NEGARA

Seterusnya, bagi menjelaskan mengenai bidang pemfailan paten, data yang diterima daripada Perbadanan Harta Intelek Malaysia (MyIPO) menunjukkan, terdapat lima (5) bidang teknologi yang menerima permohonan tertinggi untuk difailkan paten sejak tahun 2016 hingga 2020, iaitu:

1. Bioteknologi;
2. Farmaseutikal;
3. Kimia Organik Halus (*Organic fine chemistry*)
4. Teknologi Komputer; dan
5. Kimia Bahan Asas (*Basic materials chemistry*)

Sekian, Terima Kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : DATO' MASIR KUJAT [SRI AMAN]

TARIKH : 10 NOVEMBER 2021 (RABU)

SOALAN

Dato' Masir Kujat minta **MENTERI LUAR NEGERI** menyatakan apakah tindakan yang akan diambil oleh Kementerian tentang insiden provokasi Republik Rakyat China yang sering menceroboh negara kita di perairan Sarawak dan Sabah.

JAWAPAN

Tuan Yang di-Pertua,

Terima kasih saya ucapkan kepada Yang Berhormat Sri Aman di atas soalan yang dikemukakan.

Tuan Yang di-Pertua,

Pendirian Malaysia yang Konsisten

2. Dalam mengendalikan isu Laut China Selatan, kedaulatan dan kepentingan negara menjadi asas utama berhubung pendirian dan tindakan yang akan diambil oleh Kerajaan Malaysia. Kerajaan tidak akan sesekali berkompromi dalam perkara yang boleh menjejaskan keutuhan wilayah, kedaulatan dan kepentingan negara.

3. Pada masa yang sama, memandangkan isu Laut China Selatan merupakan satu isu yang kompleks dan melibatkan hubungan antara negara, ia perlu dikendalikan secara menyeluruh dan setiap tindakan yang diambil oleh Kerajaan adalah berdasarkan pertimbangan yang komprehensif.

4. Pendirian Malaysia berhubung Laut China Selatan adalah jelas. Secara ringkasnya, pendirian ini merangkumi perkara-perkara berikut:

- a. Pertamanya, semua pihak perlu memastikan keamanan, keselamatan dan kestabilan serta kebebasan pelayaran dan penerbangan, atau dengan izin, *freedom of navigation and over-flight*.
- b. Keduanya, semua pihak perlu mengelakkan tindakan yang boleh menimbulkan ketegangan dan bersifat provokatif, atau dengan izin, mengamalkan *self-restraint*, dan mengelakkan tindakan berkaitan ketenteraan, atau dengan izin, *militarisation*.

5. Pendirian negara ini juga disuarakan dengan konsisten di platform-platform serantau dan antarabangsa, di mana Malaysia menegaskan bahawa Laut China Selatan mesti kekal menjadi laluan perdagangan dan perairan yang aman.

Pendirian yang tegas

6. Apabila berlaku insiden-insiden di mana kapal-kapal kerajaan asing menceroobh atau melakukan aktiviti yang bertentangan dengan kebebasan pelayaran sebagaimana diperuntukkan di dalam Konvensyen Undang-Undang Laut Pertubuhan Bangsa-Bangsa Bersatu 1982 (KUUL 1982) di dalam perairan negara, Kerajaan Malaysia secara konsisten mengemukakan Nota Bantahan Diplomatik kepada kerajaan negara-negara yang mana kapal asing milik kerajaan negara tersebut didapati.

7. Pada 4 Oktober 2021, Kementerian Luar Negeri telah memanggil Duta Besar Republik Rakyat China untuk menyatakan pendirian dan

bantahan terhadap keberadaan dan aktiviti kapal-kapal China, termasuk kapal penyelidikan, di dalam Zon Ekonomi Eksklusif Malaysia di luar pesisir Sabah dan Sarawak. Keberadaan dan aktiviti kapal-kapal tersebut adalah bertentangan dengan Akta Zon Ekonomi Eksklusif 1984 dan Konvensyen Pertubuhan Bangsa-Bangsa Bersatu Mengenai Undang-Undang Laut (KUUL) 1982.

8. Tindakan ini diambil selaras dengan undang-undang antarabangsa dan pendirian Malaysia untuk mempertahankan kedaulatan dan hak kedaulatan dalam perairan negara. Tindakan ini juga adalah sebagai langkah Malaysia yang tidak pernah mengiktiraf tuntutan negara-negara penuntut Laut China Selatan, termasuk China, apabila tuntutan tersebut melibatkan dan bertindih dengan perairan negara berdasarkan Peta Baru Malaysia 1979.

Rundingan Kod Tatalaku di Laut China Selatan

9. Selain itu, sebagai langkah untuk memastikan keamanan, kestabilan dan mengelakkan ketegangan di Laut China Selatan, negara-negara ASEAN dan China juga telah memeterai Deklarasi Tatalaku Pihak-pihak Berkepentingan di Laut China Selatan, atau dengan izin, *Declaration on the Conduct of Parties in the South China Sea (DOC)* pada 4 November 2002.

10. Pada masa ini, negara-negara ASEAN dan China sedang merundingkan **Kod Tatalaku di Laut China Selatan**, atau dengan izin, ***Code of Conduct in the South China Sea (COC)***. COC dilihat sebagai satu kod tatacara untuk mengelakkan konflik dan ketegangan di Laut China Selatan. Ianya adalah tanpa prejudis terhadap tuntutan wilayah dan maritim negara masing-masing.

11. Dalam melaksanakan rundingan COC tersebut, Malaysia sentiasa memastikan bahawa COC yang akan dirundingkan tidak sekali-kali mengetepikan kedaulatan dan hak kepentingan negara.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL KEEMPAT
PARLIMEN KEEMPAT BELAS

PERTANYAAN : LISAN

DARIPADA : DATO' SRI ABDUL AZEEZ BIN ABDUL RAHIM [BALING]

TARIKH : 10 NOVEMBER 2021 (RABU)

SOALAN

Dato' Sri Abdul Azeez bin Abdul Rahim [Baling] minta **MENTERI PERUSAHAAN PERLADANGAN DAN KOMODITI** menyatakan langkah-langkah terbaru yang di ambil oleh Kementerian dalam menaikkan harga komoditi getah dan kelapa sawit dan apakah program bantuan untuk pekebun kecil yang terlibat dalam komoditi ini dan senaraikan pasaran negara baru yang membeli komoditi ini dari Malaysia.

JAWAPAN

1. Langkah Terkini Menstabilkan Harga Komoditi Sawit dan Getah:

- (i) Meningkatkan eksport dan mengurangkan stok melalui pengecualian duti eksport minyak isirong sawit mentah (CPKO) dan minyak isirong sawit diproses (RBDPKO) bagi syarikat-syarikat yang memenuhi kriteria permohonan. Kesannya, harga CPO telah kembali stabil dan menunjukkan arah aliran peningkatan bermula Jun 2020 sehingga kini.
- (ii) Melaksanakan persijilan Minyak Sawit Mampan Malaysia (MSPO) untuk menjenamakan minyak sawit Malaysia yang mampan dan berkualiti. Persijilan MSPO adalah mandatori bermula 1 Januari 2020.

- (iii) Meningkatkan penggunaan minyak sawit dalam negara melalui pelaksanaan Program Biodiesel Negara iaitu program B10 di sektor pengangkutan dan program B7 di sektor industri (tahun 2019) serta program B20 di sektor pengangkutan (tahun 2020).
- (iv) Memperkukuh kerjasama strategik bersama Indonesia menerusi Majlis Negara-Negara Pengeluar Minyak Sawit (*Council of Palm Oil Producing Countries* - CPOPC). Untuk makluman, mesyuarat CPOPC ini akan diadakan pada 4 Disember 2021 di Jakarta dan akan turut disertai oleh 4 negara lain iaitu Honduras, Columbia, Papua New Guinea dan Ghana.
- (v) Bagi sektor getah, meningkatkan penggunaan dalam negara melalui penggunaan getah (*Cuplump Modified Bitumen*) dalam pembinaan jalan raya dan penghasilan pelbagai produk baharu bernilai tambah tinggi seperti *seismic bearing*, sarung tangan getah dan lain-lain; dan
- (vi) Memperkukuhkan kerjasama antarabangsa di bawah kerangka *International Tripartite Rubber Council* (ITRC) yang dianggotai oleh negara-negara pengeluar utama getah dunia iaitu Thailand dan Indonesia. Di antara inisiatif yang dilaksana oleh ITRC adalah *Supply Management Scheme* bagi mengawal pengeluaran getah asli agar tidak melebihi jangkaan permintaan getah asli pada masa akan datang dan *Agreed Export Tonnage Scheme* bagi mengawal kuota eksport getah asli supaya harga tidak jatuh merudum.

2. Bantuan yang disediakan untuk pekebun kecil:

Antara program bantuan yang sedang disediakan oleh pihak kerajaan untuk membantu pekebun kecil khususnya pekebun kecil persendirian. Bagi pekebun kecil sawit, antara bantuannya termasuklah:

- Bantuan Pensijilan MSPO;
- Skim Bantuan Integrasi Tanaman (ITa);
- Skim Bantuan Integrasi Ternakan (ITe);

- Skim pembiayaan mudah untuk pekebun kecil melaksanakan aktiviti tanam semula sawit (TSPKS);
- Skim pembiayaan bagi pembelian input pertanian seperti baja sebatian (IPPKS);
- Skim Bantuan Tanaman Kontan B40 – TKB40; dan

Manakala bagi pekebun kecil getah, antara bantuannya adalah:

- Mekanisme sokongan harga iaitu Insentif Pengeluaran Getah (IPG) dengan paras pengaktifan harga (PHP) RM2.50 sekilogram;
- Program Insentif Pengeluaran Lateks (IPL); dan
- Peningkatan kadar bantuan tanam semula getah melalui Pihak Berkuasa Kemajuan Pekebun Kecil Perusahaan Getah (RISDA) daripada RM13,500 sehektar di Sarawak kepada RM14,805 sehektar bermula tahun 2021.

3. Senarai Pasaran Baharu:

Antara pasaran baharu bagi komoditi sawit adalah negara seperti Republik Congo, Antartica, Cocos Island dan Bahamas dengan jumlah eksport hampir RM 42 juta pada tahun 2020. Manakala bagi sektor getah pula adalah negara-negara seperti Christmas Island, Curaco dan Niger dengan jumlah eksport RM 1.23 juta.

Selain itu juga, pihak Kementerian sentiasa berusaha memperluaskan pasaran produk sawit Malaysia ke Benua Afrika, negara Timur Tengah, Benua Amerika selain turut memberi fokus bagi memperkukuhkan pasaran sedia ada seperti di Pakistan, Turki, negara-negara ASEAN.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 10 NOVEMBER 2021 (RABU)

SOALAN

DATUK IGNATIUS DARELL LEIKING [PENAMPANG] minta **PERDANA MENTERI** menyatakan apakah rancangan Kerajaan bagi pembangunan Sektor Biomass seperti yang disebut dalam RMK-12 khususnya bagi Wilayah Sabah.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Yang Berhormat, industri biojisim merupakan satu industri yang mampu untuk memberi pulangan ekonomi yang baik bagi negeri Sabah sekiranya diberi perhatian khusus memandangkan kuantiti biojisim yang banyak di negeri tersebut.
2. Negeri Sabah merupakan salah satu penyumbang terbesar sumber bahan mentah biojisim iaitu dianggarkan sebanyak 25% daripada jumlah keseluruhan biojisim negara.
3. Pada masa ini. Kerajaan melalui Malaysian Investment Development Authority (MIDA) sedang giat melaksanakan perbincangan dengan kerajaan negeri Sabah untuk merangka satu pelan tindakan khusus untuk pembangunan industri biojisim di negeri tersebut. Pelan ini akan menggariskan langkah dan tindakan strategik untuk menarik pelaburan yang tepat dan berkualiti bagi melonjakkan industri biojisim di Sabah.
4. Selain itu, kerajaan negeri Sabah juga sedang meneroka untuk menubuhkan satu jawatankuasa khas berkaitan biojisim bagi memandu dan mempercepat perkembangan industri ini.
5. Misi perdagangan yang bersasar juga akan dilaksanakan bagi memaksimumkan jaringan perdagangan industri biojisim di peringkat global.
6. Antara projek biojisim yang sedang berjalan dan boleh dijadikan contoh kepada negeri Sabah adalah seperti projek BioHub Port di Sarawak, projek Biovision and Greenergy (B&G)'s Segamat Integrated Biorefinery di Johor dan projek Alam Avani's Waste to Renewable Diesel di Perak. Kesemua projek ini melaksanakan pendekatan bersepadu

berdasarkan ekonomi kitaran yang akan menggalakkan pelaburan ke dalam industri ini.

7. Dalam Rancangan Malaysia Kedua Belas (RMKe-12), tumpuan akan diberikan kepada pengeluaran produk yang mempunyai nilai ditambah yang tinggi seperti biobahan api, bioproduct dan bahan kimia penting untuk industri.

8. Selain itu, ekosistem industri ini akan ditambah baik melalui pewujudan model perniagaan yang berkesan di sepanjang rantai nilai biojisim. Pembangunan kemampuan tempatan akan dipertingkatkan melalui aktiviti penyelidikan, pembangunan, pengkomersialan dan inovasi.

9. Sektor swasta terus digalakkan untuk melabur dalam aktiviti biojisim yang dipacu penyelidikan melalui khidmat nasihat yang ditambah baik. Selain itu, biojisim dan biogas telah dikenal pasti sebagai salah satu sumber yang akan dibangunkan untuk tenaga boleh baharu (TBB).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK HAJI SHABUDIN BIN YAHYA
[TASEK GELUGOR]**

TARIKH : 10 NOVEMBER 2021 (RABU)

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI LUAR NEGERI** menyatakan apakah tindakan yang diambil terhadap rakyat Malaysia yang menyalahgunakan visa pelancong dengan bekerja secara haram di Australia dan Korea Selatan. Adakah Kementerian pernah berhubung dengan Kerajaan kedua-dua negara berkaitan isu ini yang membawa nama buruk kepada Malaysia.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Tasek Gelugor atas pertanyaan yang dikemukakan.

Tuan Yang di-Pertua,

2. Kementerian Luar Negeri sentiasa memberi perhatian dan memantau isu-isu membabitkan rakyat Malaysia yang menyalahgunakan visa pelancong dengan bekerja secara haram di negara-negara seperti Australia dan Republik Korea (ROK). Kemudahan visa yang sering disalahgunakan oleh rakyat Malaysia di Australia, dengan izin, adalah *Electronic Travel Authority* (ETA), manakala di ROK adalah Visa G1 atau juga dikenali sebagai “Visa Pencari Suaka”.

3. Berdasarkan kepada undang-undang imigresen Australia, individu yang menyalahgunakan visa pelancong untuk bekerja atau tinggal lebih masa di negara itu akan dihantar pulang ke Malaysia setelah suatu tempoh tahanan. Kos penghantaran pulang perlu ditanggung oleh individu itu sendiri, walaupun terdapat juga kes-kes di mana ianya ditanggung oleh Kerajaan Australia bergantung kepada budi bicara Kerajaan negara itu.

4. Isu ini telah dibincangkan menerusi beberapa platform di antara kedua-dua buah negara. Antaranya, dengan izin, *Malaysia-Australia Immigration Cooperation Working Group* (ICWG) di antara Kementerian Dalam Negeri (KDN) kedua-dua negara yang diadakan secara tahunan. Antara fokus yang diberikan oleh kedua-dua negara melalui platform kerjasama tersebut adalah perkongsian maklumat bagi menangani isu ini.

5. Selain ICWG, antara inisiatif lain adalah melalui penempatan, dengan izin, *Australian Airline Liaison Officers* (ALO) di Lapangan Terbang Antarabangsa Kuala Lumpur (KLIA). ALO memainkan peranan membantu syarikat-syarikat penerbangan mengenalpasti individu yang

dicurigai akan menyalahgunakan dokumen perjalanan ke Australia, termasuklah kemudahan ETA.

6. Untuk makluman Dewan yang mulia ini, Kerajaan ROK pula telah mengetatkan lagi proses permohonan visa ke negara itu bagi menangani isu penyalahgunaan visa pelancong ini. Antara langkah yang diambil adalah mengenakan denda kepada mereka yang tinggal lebih daripada tempoh visa (*overstay*) yang dibenarkan di antara RM3,500.00 hingga RM69,600.00 serta larangan masuk selama 3 tahun ke atas.

7. Pihak Kerajaan Malaysia juga telah berhubung dan sentiasa bersedia bagi membincangkan isu ini dengan pihak Kerajaan ROK. Usaha ini penting bagi memastikan nama baik negara serta hubungan dua hala yang akrab antara Malaysia dan ROK tidak terjejas akibat isu-isu seumpama ini.

Tuan Yang di-Pertua,

8. Kementerian Luar Negeri komited dalam mengeluarkan peringatan dari semasa ke semasa agar semua rakyat Malaysia yang ke luar negara untuk sentiasa mematuhi undang-undang tempatan yang ditetapkan oleh Kerajaan negara tersebut demi menjaga nama baik Malaysia.

9. Kementerian Luar Negeri sentiasa bersedia dan akan terus bekerjasama dengan agensi-agensi berkaitan seperti KDN dan JIM serta pihak Kerajaan Australia dan ROK bagi memastikan isu menyalahgunakan visa pelancong untuk bekerja secara haram di negara-negara tersebut dapat ditangani dengan sebaik mungkin. Ini penting bagi bagi memastikan nama baik negara tidak terjejas akibat tindakan segelintir individu yang menyalahgunakan kemudahan yang diberikan kepada rakyat negara ini berdasarkan hubungan dua hala serta dengan izin, '*people-to-people*' yang akrab antara kedua-dua buah negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 10 NOVEMBER 2021 (RABU)

SOALAN

TUAN LOKE SIEW FOOK [SEREMBAN] minta **KEMENTERIAN PERDAGANGAN ANTARABANGSA DAN INDUSTRI** menyatakan jumlah syarikat logistik yang telah diberikan status “International Integrated Logistic Service” oleh MIDA mengikut pecahan milikan syarikat tempatan dan milikan syarikat asing serta langkah-langkah untuk memajukan sektor tersebut.

JAWAPAN

Tuan Yang di-Pertua,

1. Sektor perkhidmatan logistik merupakan komponen penting dalam rantai bekalan pelbagai sektor ekonomi termasuk pembuatan, pertanian serta komoditi. Kepentingan perkhidmatan logistik menjadi lebih ketara pada masa kini berikutan pemulihan ekonomi dunia yang terkesan dengan pandemik COVID-19.
2. Kerajaan telah memperkenalkan Status Perkhidmatan Logistik Bersepadu Antarabangsa ("*International Integrated Logistics Services, IILS*") sejak tahun 2008 untuk menggalakkan syarikat logistik tempatan dan asing beroperasi secara bersepadu dan agresif di peringkat serantau mahupun global. Status IILS adalah pra-syarat untuk mendapatkan lesen-lesen lain seperti Lesen Ejen Kastam dan Lesen Ejen Penghantar Barang. Kriteria asas kelayakan untuk memperoleh status IILS ini adalah syarikat perlu menguruskan kemudahan infrastruktur sekurang-kurangnya 20 unit kenderaan komersial dan gudang penyimpanan dengan keluasan minima 5,000m².
3. Berdasarkan rekod Lembaga Pembangunan Pelaburan Malaysia (MIDA) sehingga September 2021, sebanyak 165 buah syarikat telah diluluskan status IILS. Daripada jumlah ini, 141 atau 86 peratus adalah syarikat dengan pemilikan saham sepenuhnya oleh rakyat tempatan. Seterusnya, 12 syarikat atau 7 peratus merupakan syarikat dengan pemilikan saham sepenuhnya oleh pelabur asing. Manakala, 8 lagi syarikat atau 5 peratus adalah syarikat yang majoriti sahamnya dimiliki oleh syarikat tempatan dan 4 syarikat atau 2 peratus lagi adalah syarikat yang majoriti sahamnya dimiliki oleh syarikat asing.
4. Kerajaan mengambil pendekatan memajukan sektor ini melalui peningkatan keupayaan menerusi pengaplikasian teknologi, pengukuhan usaha menarik pelaburan dan promosi eksport.
5. Sebagai contoh, MIDA memperuntukkan Dana Strategik Pelaburan Tempatan (DISF) yang merupakan geran padanan yang ditawarkan kepada syarikat dengan majoriti pemilikan ekuiti tempatan untuk meningkatkan keupayaan penggunaan teknologi tinggi dan

pembangunan modal insan. Syarikat logistik yang layak boleh menggunakan kemudahan ini untuk meningkatkan keupayaan operasi mereka melalui penaiktarafan mesin dan peralatan, aktiviti R&D, peningkatan kemahiran kakitangan melalui latihan dan mendapatkan pensijilan antarabangsa.

6. Untuk mengukuh kedudukan negara sebagai destinasi pilihan pelaburan tempatan dan asing, Kementerian sentiasa mempergiatkan aktiviti dan program bagi mempromosikan pelaburan di dalam sektor logistik ini melalui program jangkauan (*outreach*), perbincangan meja bulat, dialog, sesi libat urus dan forum yang diadakan secara berkala.

7. Selain itu, Perbadanan Pembangunan Perdagangan Luar Malaysia (MATRADE) juga melaksanakan program-program bagi mempromosikan perkhidmatan logistik tempatan ke pasaran antarabangsa menerusi pelbagai inisiatif. Antaranya ialah program-program promosi perdagangan yang memberi penekanan kepada syarikat perkhidmatan logistik tempatan untuk meneroka pasaran antarabangsa dan memberi peluang untuk menyertai rantai bekalan perkhidmatan yang berkaitan.

8. Selain itu, MATRADE juga mempunyai program Rakan MATRADE (*Buddy Programme*) yang merupakan usaha MATRADE untuk membolehkan syarikat logistik yang terpilih menerima khidmat bimbingan secara berterusan daripada pemain di dalam industri logistik tempatan. Melalui program ini juga, syarikat yang terpilih akan dibekalkan dengan maklumat dan informasi berkaitan statistik terkini, peluang pasaran antarabangsa (*Market Alert*) dan kajian pasaran produk (*Product Market Study*).

9. Kerajaan akan sentiasa mengukuhkan dasar serta inisiatif sedia ada bagi memastikan sektor perkhidmatan logistik tempatan kekal berdaya saing bukan sahaja di arena tempatan malah di persada antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : DATO' SRI AZALINA OTHMAN [PENGERANG]

TARIKH : 10 NOVEMBER 2021 (RABU)

SOALAN

DATO' SRI AZALINA OTHMAN SAID [PENGERANG] minta **PERDANA MENTERI** menyatakan sejauh manakah keberkesanan banci dalam talian (e-Census) dan pengumpulan data menggunakan kaedah Computer Assisted Telephone Interview (CATI) dan apakah langkah - langkah proaktif kerajaan untuk menjadikan sistem ini sebagai medium utama kaedah bancian memandangkan COVID-19 akan menjadi suatu yang endemik di negara kita.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Banci Penduduk dan Perumahan Malaysia 2010 dilaksanakan dengan menggunakan kaedah konvensional iaitu temuramah secara bersemuka sebagai mod utama pembancian.
2. Berbanding dengan Banci 2010, kaedah pembancian yang diguna pakai bagi melaksanakan Banci Malaysia 2020 kali ini telah diperkukuhkan melalui Banci Dalam Talian (e-Census), *Computer Assisted Telephone Interview* (CPTI), dengan izin dan modenisasi dalam temuramah bersemuka yang menggunakan *Computer-Assisted Personal Interview* (CAPI). Walau bagaimanapun, kaedah konvensional temuramah bersemuka menggunakan Paper & Pen Interview (PAPI) atau Drop-off & Pick-up (DOPU) masih dikekalkan.
3. Banci Malaysia 2020 telah bermula sejak 7 Julai 2020 telah ditutup secara rasmi pada 31 Oktober 2021. Sebanyak 8.1 juta isirumah merangkumi 32.3 juta penduduk telah dibanci, iaitu sebanyak 99.2% daripada anggaran isirumah dan penduduk.
4. Daripada jumlah tersebut, kaedah utama yang telah diguna pakai adalah melalui CAPI dan e-Census, iaitu sebanyak 67.7% dan 23.4% penduduk, masing-masing. Manakala 0.2% pembancian dilaksanakan melalui CATI dan selebihnya 8.7% adalah dilaksanakan melalui kaedah yang lain.
5. Bagi menjadikan e-Census dan CATI sebagai medium utama dalam Banci Malaysia 2020, beberapa langkah proaktif telah diambil Kerajaan. Antara lain, termasuklah:
 - Aktiviti promosi dan publisiti yang meluas di seluruh negara sama ada melalui media elektronik, media sosial dan media cetak;

- Arahan menetapkan 100% pengisian e-Census oleh penjawat awam seperti surat edaran bertarikh 19 Oktober 2020 dari Ketua Setiausaha Negara;
- Pemantauan secara berkala status pembancian anggota di Kementerian/ Jabatan/ Agensi;
- Pelaksanaan e-Census Hour/ Day bagi Kementerian/ Jabatan/ Agensi/ Badan Berkanun secara dalam talian (*virtual*) bagi membantu anggota yang memerlukan panduan dan tunjuk ajar dalam mengisi e-Census; dan
- Mengadakan klinik e-Census di agensi kerajaan dan swasta, serta kawasan kejiranan dan komuniti setempat.

6. Selain daripada Banci Malaysia 2020, Jabatan Perangkaan Malaysia juga telah menyediakan platform e-survei dan CATI bagi survei rutin ekonomi dan isi rumah antaranya:

- Survei Perdagangan Borong & Runcit Bulanan (MDT);
- Survei Pembuatan Bulanan;
- Survei Perkhidmatan Suku Tahunan (QSS);
- Survei Tenaga Buruh (STB); dan
- Survei Pendapatan, Perbelanjaan Isi Rumah dan Kemudahan Asas (HIES) 2022.

7. Kaedah survei dalam talian telah diguna pakai oleh Jabatan Perangkaan Malaysia mulai 2009 dan akan diperluaskan lagi kepada survei/ banci yang lain.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : YB KASTHURIRAANI A/P PATTO

TARIKH : 10 NOVEMBER 2021 (RABU)

SOALAN

YB KASTHURIRAANI A/P PATTO [BATU KAWAN] minta **MENTERI LUAR NEGERI** menyatakan apakah kad laporan pihak Kerajaan dan usaha yang diambil untuk melobi tempat di UN Human Rights Council.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Batu Kawan atas pertanyaan yang dikemukakan.

Tuan Yang di-Pertua,

2. Seperti Dewan yang mulia ini sedia maklum, Malaysia telah berjaya menganggotai Majlis Hak Asasi Manusia (MHAM) bagi penggal 2022–2024 setelah dipilih melalui pengundian yang diadakan semasa Sesi ke-76 Perhimpunan Agung Pertubuhan Bangsa-Bangsa Bersatu (PBB) di New York pada Khamis, 14 Oktober 2021.

3. Antara usaha–usaha melobi yang telah dijalankan oleh negara sehingga mencapai kejayaan tersebut adalah mengadakan sesi libat urus dengan masyarakat sivil tempatan dalam memberi penerangan mengenai ikrar dan komitmen yang akan dilakukan oleh Malaysia semasa menganggotai MHAM. Sesi libat urus tersebut juga bertujuan mengumpulkan maklum balas mengenai perkara–perkara yang perlu dilakukan oleh pihak Kerajaan dalam menambahbaik situasi hak asasi manusia dalam negara.

4. Malaysia turut menyertai sesi libat urus di peringkat antarabangsa dengan menyertai program yang dianjurkan secara maya oleh *International Service for Human Rights* (ISHR) dan *Amnesty International* pada 8 September 2021. ISHR yang berpengkalan di New York dan Geneva, manakala *Amnesty International* yang berpengkalan di United Kingdom, merupakan masyarakat sivil yang menumpukan usaha dalam mempromosi dan melindungi hak asasi manusia di peringkat antarabangsa.

5. ISHR dan Amnesty International telah menyediakan kad laporan (*scorecard*) bagi setiap Negara yang bertanding untuk MHAM. Kad laporan tersebut menyediakan perbandingan objektif seimbis lalu antara negara–negara calon dengan memberi tumpuan kepada kerjasama yang diberikan oleh setiap negara calon kepada mekanisme MHAM, sokongan

mereka terhadap masyarakat sivil dan penglibatan mereka dengan badan-badan triti PBB dan Pemegang Mandat Prosedur Khas (SPMH).

6. Kad laporan tersebut dibangunkan sebagai salah satu mekanisme untuk masyarakat sivil turut serta memberi penilaian ke atas calon MHAM. Walau bagaimanapun, pihak ISHR mengakui terdapat kekangan di dalam penyediaan kad laporan tersebut, antaranya kekangan data dan maklumat lengkap yang menyebabkan kriteria kad laporan ini adalah ringkas dan tidak menyeluruh. Bagi Malaysia, kad laporan tersebut menjadi rujukan mengenai perkara-perkara yang masih perlu diberikan penekanan oleh negara dalam memperbaiki pengendalian perihal hak asasi manusia dalam negara, daripada kacamata masyarakat madani di peringkat antarabangsa.

7. Untuk makluman Dewan yang mulia ini, memandangkan pemilihan calon MHAM dilaksanakan di antara negara-negara anggota PBB, usaha-usaha melobi yang dilakukan oleh Malaysia lebih tertumpu kepada aktiviti untuk mendapatkan sokongan setiap negara ahli, sama ada secara langsung atau timbal balas (*quid pro quo*). Usaha melobi ini telah dijalankan oleh Kementerian Luar Negeri dengan diketuai oleh YB Menteri Luar Negeri, serta Perutusan Tetap Malaysia ke PBB di New York dan Geneva dan Perwakilan-perwakilan Malaysia di luar negara.

8. Pemilihan Malaysia ke MHAM merupakan bukti pengiktirafan dan keyakinan negara-negara anggota terhadap usaha dan peranan Malaysia dalam membina kesepakatan serta menyumbang terhadap kemajuan hak asasi manusia diperingkat antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 10 NOVEMBER 2021 (RABU)

SOALAN

TUAN KESAVAN A/L SUBRAMANIAM [SUNGAI SIPUT] minta **PERDANA MENTERI** menyatakan senarai projek-projek yang telah dirancang oleh Kerajaan dalam Rancangan Malaysia Kedua Belas (RMK-12) bagi kawasan Parlimen Sungai Siput.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Sebanyak 7 projek telah diluluskan untuk pelaksanaan di Parlimen Sungai Siput, Perak pada tahun 2021 dengan peruntukan sebanyak RM9.56 juta. Ia melibatkan 3 projek baharu dan 4 projek sedia ada.
2. Bagi tahun 2022, Parlimen Sungai Siput telah diperuntukkan sebanyak RM13.95 juta bagi melaksanakan 3 projek baharu dan 4 projek sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN CHONG CHIENG JEN [STAMPIN]

TARIKH : 10 NOVEMBER 2021 (RABU)

SOALAN:

TUAN CHONG CHIENG JEN [STAMPIN] minta **PERDANA MENTERI** menyatakan menyatakan apakah kesan pelan pemulihan ekonomi yang akan dilaksanakan oleh Kerajaan Persekutuan ke atas tahap pendapatan isi rumah di seluruh negara dan apakah statistik berkenaan untuk setiap negeri.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Pandemik COVID-19 telah memberi impak ketara terhadap sektor sosial dan ekonomi di seluruh dunia termasuk Malaysia. Kebanyakan negara terkesan dari krisis kesihatan dan ekonomi berikutan pelaksanaan Perintah Kawalan Pergerakan (PKP) sebagai langkah utama bagi mengekang penularan pandemik COVID-19. Keluaran Dalam Negeri Kasar (KDNK) Malaysia telah menguncup sebanyak 5.6% pada tahun 2020.

2. Sebagai Kerajaan yang prihatin, kerajaan telah melaksanakan strategi Pemulihan Ekonomi Negara 6R dengan tumpuan untuk melindungi kehidupan rakyat, kelangsungan perniagaan dan menjana ekonomi terutama bagi mendepani pandemik COVID-19. Lapan pakej rangsangan ekonomi dengan jumlah sebanyak RM530 bilion telah diperuntukkan oleh Kerajaan bagi membantu rakyat meneruskan kelangsungan hidup dalam tempoh mencabar ini. Antara lain, termasuk:

- Moratorium pembayaran pinjaman memanfaatkan lebih daripada 7 juta peminjam individual dan PKS;
- Bantuan Prihatin Nasional (BPN) yang merupakan pemberian tunai telah memanfaatkan hampir 11 juta penerima;
- Program subsidi upah yang bertujuan untuk mengekalkan pekerjaan telah memanfaatkan lebih daripada 2.5 juta pekerja dan lebih daripada 300 ribu majikan;
- Program Insentif Pengambilan Pekerja dan Bantuan Latihan memanfaatkan kira-kira 140 ribu pekerja; dan
- Program Kemahiran dan Peningkatan Kemahiran memanfaatkan 150 ribu individu.

3. Melalui Bajet 2021, Kerajaan meneruskan agenda meningkatkan kesejahteraan rakyat dengan pemberian bantuan kepada rakyat

khususnya golongan yang mudah terjejas termasuk kumpulan B40. Antara bantuan yang diberikan termasuk:

- Bantuan PRIHATIN Rakyat (BPR) dahulunya dikenali sebagai BSH dengan bantuan kewangan sehingga RM1,800; dan
- Perlindungan MySalam dan Program Pengangkutan Awam di bawah My30.

4. Berdasarkan Laporan Anggaran Pendapatan 2020 oleh Jabatan Perangkaan Malaysia melaporkan pada tahun 2020, pendapatan bergaji dan bekerja sendiri yang merupakan punca utama pendapatan isi rumah masing-masing telah mencatatkan penurunan sebanyak negatif 16.1 peratus dan negatif 9.7 peratus. Walau bagaimanapun, pendapatan isi rumah daripada pindahan semasa yang diterima telah meningkat 14.4 peratus dan menyumbang 10.6 peratus kepada jumlah pendapatan isi rumah pada tahun 2020. Peningkatan pindahan semasa yang diterima ini yang sebahagian besarnya disumbangkan oleh pakej rangsangan yang disediakan oleh kerajaan dan pelbagai bantuan yang disalurkan bagi membantu meringankan beban kewangan isi rumah.

5. Melalui Bajet 2022 yang telah dibentangkan pada 29 Oktober lalu, bantuan seperti pindahan tunai dan sokongan penjagaan kesihatan akan terus disediakan berdasarkan keperluan. Program kebajikan produktif seperti keusahawanan dan pembiayaan mikro akan dipergiat untuk menyediakan peluang ekonomi kepada isi rumah miskin.

6. Bagi strategi jangka sederhana dan panjang di bawah RMKe-12, Kerajaan juga akan meneruskan dasar dan strategi untuk meningkatkan pendapatan dan kuasa beli serta kesejahteraan terutamanya isi rumah miskin dalam kalangan B40 termasuk: menyediakan program peningkatan pendapatan serta peningkatan keupayaan; menambah baik akses kepada keperluan asas termasuk pendidikan, kesihatan dan perumahan; menggalakkan keusahawanan dan akses kepada pembiayaan kewangan; dan meningkatkan sistem perlindungan sosial.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN WONG TACK [BENTONG]

TARIKH : 10 NOVEMBER 2021 (RABU)

SOALAN

TUAN WONG TACK [BENTONG] minta **MENTERI ALAM SEKITAR DAN AIR** menyatakan mengapa *Environmental Impact Assessment* (EIA) kilang kertas milik Nine Dragons Paper di Bentong boleh diluluskan memandangkan ianya terletak di kawasan tadahan air yang merupakan sumber untuk 2 juta liter air mentah sehari ke loji rawatan air Langat 2 di Selangor.

JAWAPAN

Tuan Yang Di-Pertua,

1. Laporan Penilaian Kesan Kepada Alam Sekeliling (*Environmental Impact Assessment* - EIA) merupakan kajian yang memberikan maklumat berhubung dengan kualiti alam sekeliling, impak-impak yang mungkin boleh berlaku akibat cadangan pembangunan dan juga cadangan langkah mitigasi yang akan dilaksanakan.
2. Kilang kertas milik Nine Dragons Paper terletak di Lot 1, Kawasan Perindustrian Bentong IIB, Mukim Sabai, 28600 Karak, Pahang dan merupakan penaiktarafan dan menyusun semula (*revamping*) komponen kilang dalam premis sediaada.
3. Laporan EIA bagi cadangan projek "*Proposed Increase Of Production Capacity For Existing Recycled Paper Mill On Lot 1, Kawasan Perindustrian Bentong IIB, Mukim Sabai, 28600 Karak, Pahang, Malaysia*" telah dibincangkan dalam Mesyuarat Jawatankuasa Teknikal EIA yang turut dihadiri oleh agensi-agensi teknikal berkaitan seperti Jabatan Pengairan dan Saliran (JPS) Negeri Pahang, Badan Kawal Selia Air Negeri Pahang, Jabatan Keselamatan dan Kesihatan Pekerjaan (JKKP), Jabatan Mineral dan Geosains (JMG) Negeri Pahang, Jabatan Kesihatan Negeri Pahang dan Lembaga Pembangunan Pelaburan Malaysia (MIDA).
4. Laporan EIA ini **diluluskan** di bawah Seksyen 34A(3), Akta Kualiti Alam Sekeliling 1974 (AKAS 1974) berdasarkan:
 - (i) telah memenuhi bagi keperluan Seksyen 34(A)4(a) AKAS 1974 iaitu keselarasan pembangunan dengan gunatanah sedia ada. Tapak cadangan projek terletak di Blok Perancangan Kecil (BPK) 2.2: Sg Dua – Jambu Rias. Kawasan Perindustrian Bentong IIB di zonkan sebagai kawasan industri; dan

- (ii) telah memenuhi kehendak-kehendak Seksyen 34A(2C) AKAS 1974 iaitu mematuhi garis panduan yang telah ditetapkan oleh Ketua Pengarah Jabatan Alam Sekitar (JAS) dan mengandungi penilaian mengenai kesan aktiviti yang dijangkakan dan menyatakan langkah-langkah mitigasi yang dicadangkan.

5. Di dalam Laporan EIA ada dimaklumkan bahawa terdapat Loji Rawatan Air Karak 2 (14.7 km) yang dalam proses pembinaan yang terletak di hilir tapak cadangan projek. Walau bagaimanapun, berdasarkan pemodelan kualiti air yang dijalankan pada dua keadaan iaitu semasa aliran air sungai biasa dan keadaan air sungai cetek (musim kemarau) menunjukkan bahawa pelepasan efluen daripada kilang tidak memberi perubahan yang signifikan terhadap kualiti air Sg Bentong serta tidak memberi kesan terhadap Loji Air Karak Fasa 2.

6. Semasa peringkat operasi, sistem pengolahan efluen perindustrian akan dinaiktaraf dengan kapasiti rekabentuk $4,000\text{m}^3$ sehari dengan tambahan teknologi *up-flow multistage anaerobic reactor (UMAR)*. Kebanyakan efluen yang dirawat ($\sim 3,200\text{m}^3$ sehari) akan digunakan semula dalam pemprosesan.

7. Pelepasan efluen daripada sistem pengolahan efluen perindustrian hendaklah mematuhi **Standard A, Jadual Kelima (Peraturan 11) dan Jadual Ketujuh (Peraturan 12)** di dalam Peraturan-Peraturan Kualiti Alam Sekeliling (Efluen Perindustrian) 2009 sebelum dilepaskan ke Sungai Bentong.

8. Untuk makluman, keputusan bagi kelulusan membina dan operasi kilang yang dimaksudkan adalah di bawah tanggungjawab Pihak Berkuasa Yang Meluluskan (PBM) iaitu Majlis Perbandaran Bentong selaras dengan dasar dan polisi yang ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG HON WAI [BUKIT
BENDERA]**

TARIKH : 10 NOVEMBER 2021 (RABU)

SOALAN :

TUAN WONG HON WAI [BUKIT BENDERA] minta **PERDANA MENTERI** menyatakan usaha pembaharuan undang-undang yang telah atau sedang diusahakan oleh Jabatan Perdana Menteri sejak Mac 2020 dan bilakah pembaharuan tersebut akan dibentangkan di Parlimen.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Kerajaan sentiasa komited memastikan penetapan dasar berkaitan pembaharuan undang-undang yang akan dilaksanakan, dirangka berdasarkan keperluan negara dan rakyat. Dalam hal ini, kajian perundangan dan sesi libat urus yang holistik serta komprehensif dengan semua pihak berkepentingan menjadi fokus utama sebelum suatu pembaharuan undang-undang sama ada gubalan undang-undang baharu, pindaan atau pemansuhan Akta dilaksanakan.

Semenjak Mac 2020, pelbagai kajian pembaharuan undang-undang dilaksanakan Kerajaan, antaranya termasuk yang sedang diusahakan Jabatan Peguam Negara sebagaimana berikut:

- i. Kajian Akta Rumah Perjudian Terbuka 1953 [*Akta 289*];
- ii. Rang Undang-Undang Penghinaan Mahkamah;
- iii. Kajian bagi Kesalahan Percubaan Membunuh Diri di bawah Kanun Keseksaan;
- iv. Kajian Pengasingan Peranan Peguam Negara dan Pendakwa Raya; dan
- v. Cadangan Pewujudan Pejabat Pengarah Pendakwaan di Badan Berkanun; dan
- vi. Kajian Undang-Undang Lapuk (*archaic laws*).

Selain itu, selaras dengan Memorandum Persefahaman Transformasi dan Kestabilan Politik di antara Kerajaan Persekutuan dan Pakatan Harapan yang telah ditandatangani pada 13 September 2021, Rang Undang-Undang Anti-Lompat Parti dan had tempoh jawatan Perdana Menteri tidak melebihi sepuluh (10) tahun masih dalam peringkat kajian oleh Kementerian/Jabatan/Agensi berkaitan. Pada masa yang sama, Kerajaan juga sentiasa mengemaskini Peraturan dan Tatacara Operasi Standard (*Standard Operating Procedure*) di bawah Akta Pencegahan dan Pengawalan Penyakit Berjangkit 1988 [Akta 342] semenjak 18 Mac 2021 agar mekanisme pengurusan, pengawalan dan penguatkuasaan pandemik COVID-19 berada pada tahap terbaik.

Secara umumnya, keperluan pembentangan pembaharuan undang-undang di Parlimen adalah tertakluk kepada jenis pembaharuan undang-undang yang dilaksanakan. Sebagai contoh, undang-undang subsidiari yang diperuntukkan di bawah kuasa Menteri melalui perintah yang diwartakan tidak memerlukan pembentangan di Parlimen berbanding pindaan Perlembagaan Persekutuan yang memerlukan undi majoriti dua per tiga ahli Dewan. Faktor ini juga akan menentukan kesesuaian tarikh pembentangan pembaharuan undang-undang di Parlimen.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TUAN WONG LING BIU [SARIKEI]

TARIKH : 10 NOVEMBER 2021 (RABU)

SOALAN

TUAN WONG LING BIU [SARIKEI] minta **PERDANA MENTERI** menyatakan berapa jumlah pegawai awam dari Sarawak berkhidmat di Semenanjung Malaysia.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Sehingga 27 Oktober 2021, bilangan pegawai awam kelahiran Sarawak yang bertugas di Kementerian dan Jabatan di Semenanjung Malaysia ialah seramai 16,073 orang iaitu seramai 6,273 pegawai lelaki dan 9,800 pegawai wanita.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN WONG CHEN [SUBANG]

TARIKH : 10 NOVEMBER 2021 (RABU)

SOALAN

TUAN WONG CHEN [SUBANG] minta **MENTERI LUAR NEGERI** menyatakan perkembangan dan pencapaian ASEAN, sekiranya ada, berkenaan konsensus lima perkara mengenai krisis Myanmar.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Subang atas pertanyaan yang dikemukakan

Tuan Yang di-Pertua,

2. Pada ketika ini, Malaysia mengambil pendekatan bekerjasama dengan Negara-negara Anggota ASEAN dan tidak bergerak secara bersendirian. Ini mengambil kira bahawa ASEAN mempunyai pengaruh yang lebih besar ke atas Myanmar secara kolektif supaya negara tersebut kembali ke landasan demokrasi seperti yang telah dimandatkan oleh rakyat Myanmar menerusi pilihan raya yang diadakan pada November 2020.

3. Sepertimana Dewan yang mulia ini sedia maklum, satu pertemuan di kalangan Pemimpin-pemimpin ASEAN (*ASEAN Leaders' Meeting*) telah berlangsung di Sekretariat ASEAN, Jakarta pada 24 April 2021.

4. Susulan pertemuan tersebut, Kenyataan Pengerusi ASEAN yang merangkumi dengan izin, *Five-Point Consensus* telah dikeluarkan dan dipersetujui oleh semua pihak termasuk Jeneral Kanan Min Aung Hlaing yang hadir mewakili pihak junta tentera Myanmar. *Five-Point Consensus* ini merupakan lima perkara yang dikenal pasti oleh ASEAN yang perlu dilaksanakan dalam usaha mencari jalan penyelesaian terhadap pergolakan yang berlaku di Myanmar. Antaranya, *Five-Point Consensus* berkenaan memberi mandat kepada Utusan Khas Pengerusi ASEAN mengenai Myanmar untuk mengadakan lawatan ke Myanmar bagi memudah cara dialog konstruktif bersama semua pihak berkepentingan bagi mencapai penyelesaian damai demi kepentingan rakyat Myanmar.

5. Setakat ini, lawatan tersebut masih belum dapat dilaksanakan memandangkan pihak berkuasa tentera Myanmar enggan membenarkan Utusan Khas bertemu dengan pihak-pihak berkepentingan tertentu.

6. Utusan Khas akan meneruskan usaha berbincang dengan pihak berkuasa tentera Myanmar berhubung pelaksanaan *Five-Point Consensus* ini sebagaimana diamanah oleh para Pemimpin ASEAN.

7. Keengganan pihak junta tentera Myanmar untuk membenarkan Utusan Khas melawat Myanmar dan mengadakan pertemuan dengan semua pihak yang berkepentingan termasuklah pihak anti-junta telah menyebabkan usaha Utusan Khas menemui jalan buntu.

Tuan Yang di-Pertua,

8. Malaysia menyokong penuh usaha-usaha Utusan Khas Pengerusi ASEAN berkenaan Myanmar dalam melaksanakan *Five-Point Consensus* tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHD. AZIS BIN JAMMAN
[SEPANGGAR]**

TARIKH : 10 NOVEMBER 2021 (RABU)

SOALAN

DATUK MOHD. AZIS BIN JAMMAN [SEPANGGAR] minta **PERDANA MENTERI** menyatakan adakah Peruntukan Khas Perdana Menteri untuk kawasan Parlimen diberikan kepada semua Ahli Parlimen termasuk mereka yang tidak menandatangani Memorandum Persefahaman (MOU) dengan Kerajaan, jumlahnya dan bilakah ianya diberikan.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Peruntukan Khas YAB Perdana Menteri untuk kawasan Parlimen hanyalah sebagai penambah dan pelengkap kepada peruntukan di bawah Rancangan Malaysia Lima Tahun. Penyediaan dan penyaluran peruntukan ini adalah mengikut dasar sedia ada dan tertakluk kepada kemampuan semasa kewangan Kerajaan.
2. Pihak Unit Penyelarasan Pelaksanaan, Jabatan Perdana Menteri, (ICU, JPM) sedang mengambil tindakan berhubung penyaluran peruntukan ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN KHOO POAY TIONG
[KOTA MELAKA]**

TARIKH : 10 NOVEMBER 2021 (RABU)

SOALAN

TUAN KHOO POAY TIONG [KOTA MELAKA] minta **PERDANA MENTERI**

menyatakan :-

- (a) tahap kesediaan Suruhanjaya Pilihan Raya (SPR) untuk menganjurkan pilihan raya dalam situasi endemik COVID-19, termasuklah langkah-langkah persediaan yang telah diambil; dan
- (b) adakah SPR bercadang meluaskan undi pos atau undi awal untuk mengurangkan pergerakan merentas negeri, khususnya untuk pengundi Sabah dan Sarawak.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

(a) Persediaan Menjalankan Pilihan Raya Dalam Tempoh Endemik Covid-19

Untuk makluman Ahli Yang Berhormat, Suruhanjaya Pilihan Raya (SPR) sentiasa bersedia bagi menghadapi kemungkinan berlakunya Pilihan Raya Umum (PRU) Ke-15. Ini adalah penting bagi memastikan pengendalian penjalanan pilihan raya tersebut berjalan dengan lancar dan sempurna terutamanya dalam tempoh pasca COVID-19.

SPR telah membuat persediaan dan perancangan yang menyeluruh meliputi aspek seperti keperluan bajet pilihan raya, peralatan, logistik, pembangunan sistem, pengurusan sumber manusia, latihan kepada petugas, Garis Panduan COVID-19 bagi Pelaksanaan Pilihan Raya dan juga aspek-aspek lain yang berkaitan.

SPR dengan kerjasama Majlis Keselamatan Negara (MKN) dan Kementerian Kesihatan Malaysia (KKM) sedang meneliti dan merangka penambahbaikan Garis Panduan Pencegahan COVID-19 Bagi Pelaksanaan Pilihan Raya sama ada Pilihan Raya Umum (PRU) atau Pilihan Raya Kecil (PRK) yang baharu di mana isu kesihatan dan keselamatan dalam pelaksanaan pilihan raya menjadi keutamaan dengan mengambil kira situasi COVID-19 pada ketika ini. Garis panduan ini akan disesuaikan selaras dengan Fasa Pelan Pemulihan Negara dan arahan Perintah Kawalan Pergerakan semasa di bawah Akta 342.

SPR akan mengumumkan Garis Panduan Pencegahan COVID-19 berkenaan setelah penelitian bersama pihak MKN dan KKM mengenai pelaksanaan serta penguatkuasaannya selesai dan dimuktamadkan.

(b) Undi Pos

Untuk makluman Ahli Yang Berhormat, **Perkara 119 Perlembagaan Persekutuan** menetapkan salah satu kelayakan untuk didaftarkan sebagai pemilih ialah bermastautin dalam mana-mana Bahagian Pilihan Raya. Bagi maksud tersebut, SPR menentukan **Bahagian Pilihan Raya seseorang pemilih berdasarkan kepada alamat pemastautin pemilih seperti di kad pengenalan** dan pangkalan data Jabatan Pendaftaran Negara.

Pada masa ini SPR tidak bercadang untuk memperluaskan kemudahan undi pos atau undi awal bagi pemilih yang berada di luar bahagian pilihan raya. Bagi pengundi-pengundi di negeri Sabah dan Sarawak yang bermastautin di semenanjung Malaysia, SPR menggalakkan pengundi untuk memohon pertukaran Bahagian Pilihan Raya berdasarkan tempat bermastautin terkini bagi memudahkan urusan pengundian bagi suatu pilihan raya umum atau kecil.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PRABAKARAN A/L M
PARAMESWARAN [BATU]**

TARIKH : 10 NOVEMBER 2021 (RABU)

SOALAN

YB PRABAKARAN A/L M PARAMESWARAN [BATU] minta **MENTERI LUAR NEGERI** menyatakan bilakah Malaysia akan bersetuju untuk meratifikasikan International Covenant on Civil and Political Right (ICCPR). Soalan ini pernah diajukan pada Parlimen Ke-12 (5 Mei 2008) oleh Datin Seri Wan Azizah. Menurut data dari United Nations Human Rights Treaty Bodies, Malaysia masih belum meratifikasikan perkara ini.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Batu atas pertanyaan yang dikemukakan.

Tuan Yang di-Pertua,

2. Untuk makluman Yang Berhormat, *International Covenant on Civil and Political Right* (ICCPR) adalah di bawah bidang tugas Bahagian Hal Ehwal Undang–Undang, Jabatan Perdana Menteri (BHEUU). Walau bagaimanapun, saya akan menjawab soalan yang diajukan dengan memberi tumpuan kepada proses aliran kerja yang diambil sebelum Malaysia meratifikasi triti antarabangsa.

3. Sebelum Malaysia bersetuju untuk meratifikasi sebarang triti, pihak Kerajaan perlu membuat penilaian terperinci untuk dipertimbangkan, sebelum memberikan apa-apa keputusan. Pihak kerajaan sentiasa bersifat terbuka dan bersedia untuk meratifikasi sebarang triti, sama ada yang mengikat daripada perspektif perundangan (*legally binding*) atau tidak mengikat daripada perspektif perundangan (*non-legally binding*), selagi ia menyumbang ke arah kesepakatan negara dengan undang-undang antarabangsa.

4. Untuk makluman Dewan yang mulia ini, sehingga hari ini, Malaysia telah meratifikasikan lebih daripada 50 perjanjian antarabangsa yang merangkumi isu-isu seperti alam sekitar, hak asasi manusia, keselamatan dan hal ehwal maritim.

5. Dalam proses menjadi ahli kepada mana-mana triti, terdapat ruang atau fasa yang perlu di ambil oleh pihak Kerajaan sebelum keputusan akhir dibuat. Antaranya, Kementerian atau agensi peneraju akan menyediakan kertas cadangan, disusuli dengan penganjuran bengkel atau mesyuarat antara agensi yang terlibat bagi membincangkan cadangan supaya Malaysia menjadi ahli kepada triti yang dimaksudkan, dalam hal ini ICCPR.

6. Kementerian atau agensi peneraju juga akan mengadakan sesi libat urus bersama pemegang taruh, akademik dan masyarakat sivil (CSO) bagi mendapatkan maklum balas dan berkongsi input yang diperoleh semasa bengkel dalaman atau mesyuarat antara agensi yang telah dijalankan. Selain itu juga, sesi libat urus akan turut melibatkan orang ramai bagi mendengar pandangan sebelum Kerajaan menandatangani dan meratifikasi sebarang triti antarabangsa.

7. Bagi memastikan proses libat urus memberi impak yang lebih, Kementerian Luar Negeri sedang bekerjasama dengan Pejabat Pesuruhjaya Tinggi PBB bagi Hak Asasi Manusia (OHCHR) untuk menterjemahkan 9 perjanjian hak asasi manusia yang utama ke dalam Bahasa Malaysia. Usaha ini bertujuan untuk meningkatkan kesedaran rakyat dan semua pihak yang berkepentingan dengan memberi pemahaman yang tepat mengenai obligasi negara dan implikasi perjanjian-perjanjian tersebut sekiranya Malaysia meratifikasi setiap triti yang dikenal pasti.

8. Proses aliran kerja yang dilakukan adalah penting, terutamanya yang melibatkan triti yang mengandungi peruntukan undang-undang antarabangsa yang menyentuh perkara-perkara yang melibatkan isu sensitif kepada rakyat tempatan seperti yang terkandung di dalam ICCPR.

9. Sukacita saya ingin tekankan di dalam Dewan yang mulia ini, pihak Kerajaan akan sentiasa prihatin dengan mendengar, menghormati dan tidak membelakangkan pandangan rakyat dan pemegang taruh yang lain dalam hal meratifikasi sebarang triti antarabangsa. Buat masa ini, Kerajaan masih belum membuat keputusan untuk meratifikasi ICCPR.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS (2021)**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 10 NOVEMBER 2021 (RABU)

SOALAN

TUAN NGA KOR MING [TELUK INTAN] minta **PERDANA MENTERI** menyatakan satu per satu secara terperinci jumlah kos membaiki pejabat anggota kabinet 69 orang Menteri dan Timbalan Menteri dari tempoh 2020 hingga kini.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Di Pertua,

1. Penyelenggaraan Pejabat-Pejabat Menteri dan Timbalan Menteri merupakan salah satu dari keperluan dalam pengurusan fasiliti sesebuah bangunan. Ini bagi memastikan semua fasiliti dan kemudahan di pejabat-pejabat tersebut akan sentiasa terpelihara dalam keadaan yang baik dan kekal berfungsi sebagaimana yang dikehendaki. Justeru itu, penyelenggaraan bagi Pejabat-Pejabat Menteri dan Timbalan Menteri sentiasa dijalankan dari semasa ke semasa.

2. Dalam hal ini, antara kos penyelenggaraan yang terlibat adalah membaik pulih sistem pendawaian yang rosak, siling yang rosak, karpet dan perabot yang usang, serta memasang sistem telesidang video di pejabat dan bilik mesyuarat anggota pentadbiran. Sepanjang tahun 2020

NO. SOALAN : 30

dan 2021, sebanyak 14 Kementerian/Jabatan telah membuat kerja-kerja penyelenggaraan berkala dengan kos keseluruhan adalah sebanyak RM 4.004 juta.

3. Kementerian dan Jabatan yang terlibat adalah:

BIL	KEMENTERIAN/JABATAN	JUMLAH KOS (RM)
1	Jabatan Perdana Menteri	1,073,580.00
2	Kementerian Sains, Teknologi dan Inovasi	365,240.00
3	Kementerian Kesihatan Malaysia	49,242.00
4	Kementerian Sumber Manusia	205,191.10
5	Kementerian Perpaduan	589,618.00
6	Kementerian Perdagangan Dalam Negeri dan Hal Ehwal Pengguna	425,130.00
7	Kementerian Belia dan Sukan	17,225.00
8	Kementerian Pelancongan, Kesenian dan Kebudayaan	8,500.00
9	Kementerian Perusahaan Perladangan dan Komoditi	398,604.13
10	Kementerian Pertanian Dan Industri Makanan	118,793.00
11	Kementerian Pertahanan Malaysia	123,864.00
12	Kementerian Kewangan	227,375.00
13	Kementerian Komunikasi dan Multimedia Malaysia	9,612.00
14	Kementerian Wilayah Persekutuan	392,202.34
JUMLAH		4,004,176.57

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 10 NOVEMBER 2021 (RABU)

SOALAN

PUAN HAJAH NATRAH BINTI ISMAIL [SEKIJANG] minta **PERDANA MENTERI** menyatakan sama ada Kerajaan akan meminda atau menguatkuasakan sepenuhnya Akta Perlindungan Pemberi Maklumat 2010 (Akta 711) kepada penjawat awam yang melapor kes berkaitan salah laku penjawat awam di sekolah dan apakah jaminan Kerajaan dalam memastikan pemberi maklumat ini dilindungi dan tidak dikenakan tindakan terhadap mereka.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Akta Perlindungan Pemberi Maklumat 2010 [Akta 711] telah digubal bagi memperuntukkan perlindungan terhadap pemberi maklumat yang mendedahkan sesuatu kelakuan tidak wajar di mana Akta ini telah berkuat kuasa pada 15 Disember 2010. Pendedahan kelakuan tidak wajar adalah merujuk kepada apa-apa kelakuan yang jika terbukti, menjadi suatu kesalahan tatatertib atau kesalahan jenayah. Perlindungan yang diberikan di bawah Akta 711 adalah merangkumi tiga perkara iaitu:

- i. perlindungan maklumat sulit. Sebagai contoh, maklumat mengenai identiti, pekerjaan, alamat kediaman, tempat pekerjaan dan lain-lain;
- ii. kekebalan daripada tindakan sivil atau jenayah yang cuba dikenakan terhadap pemberi maklumat. Sebagai contoh, seseorang pemberi maklumat, tidak boleh disaman atau didakwa oleh pihak yang telah didedahkan kelakuan tidak wajarnya; dan
- iii. perlindungan terhadap tindakan yang memudaratkan. Sebagai contoh, seorang pemberi maklumat telah memberi maklumat mengenai perbuatan rasuah majikannya. Jika majikannya ingin mengambil tindakan balas seperti membuang kerja si pemberi maklumat itu, maka pemberi maklumat itu adalah dilindungi di bawah akta ini.

Untuk mendapatkan perlindungan di bawah Akta 711, pemberi maklumat hendaklah menyalurkan maklumat hanya kepada agensi penguat kuasa sahaja. Berdasarkan Akta 711, “agensi penguat kuasa” adalah merujuk kepada agensi yang ditubuhkan oleh Kerajaan Persekutuan atau Negeri yang diberi kuasa penyiasatan dan

penguatkuasaan di bawah undang-undang bertulis. Pendedahan kelakuan tidak wajar tersebut boleh dibuat dengan syarat pendedahan itu tidak dilarang secara khusus oleh mana-mana undang-undang bertulis (iaitu sebagai contoh Akta Rahsia rasmi 1972). Namun, perlindungan boleh dibatalkan sekiranya:

- i. pemberi maklumat turut terlibat dalam kelakuan tidak wajar itu;
- ii. membuat kenyataan palsu;
- iii. pendedahan tersebut merupakan perkara remeh temeh;
- iv. perkara didedahkan mempersoalkan merit dasar kerajaan;
- v. pendedahan dibuat bagi mengelak daripada dibuang kerja atau tindakan tatatertib; dan
- vi. pemberi maklumat melakukan apa-apa kesalahan di bawah Akta 711 (seperti mendedahkan maklumat sulit).

Oleh itu, sekiranya pendedahan penjawat awam yang melapor kes berkaitan salah laku penjawat awam di sekolah adalah mengikut tatacara yang diperuntukkan di bawah Akta 711 seperti yang dimaklumkan tadi, maka penjawat awam tersebut boleh dilindungi di bawah Akta 711.

Kerajaan melalui agensi penguat kuasa akan melindungi pemberi maklumat tersebut sekiranya pemberi maklumat tersebut membuat pendedahan berdasarkan tatacara yang telah ditetapkan di bawah Akta 711 ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 10 NOVEMBER 2021 (RABU)

SOALAN:

PUAN NOORITA BINTI SUAL [TENOM] minta **PERDANA MENTERI** menyatakan apakah tindakan susulan Kerajaan yang akan diambil terhadap kes Kertas Pandora, memandangkan ianya berkaitan dengan isu kewangan dan rasuah di negara kita.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Secara dasarnya penggunaan akaun luar pesisir bukanlah satu kesalahan di bawah undang-undang Malaysia dan tindakan akan diambil sekiranya terdapat bukti berkaitan salah laku jenayah mana-mana individu atau syarikat.

Struktur Kewangan Malaysia dikendalikan oleh Bank Negara Malaysia melalui Akta Perkhidmatan Kewangan 2013 [Akta 758], Akta Perkhidmatan Kewangan Islam 2013 [Akta 759] dan Akta Perniagaan Perkhidmatan Wang 2011 [Akta 731]. Aktiviti penguatkuasaan dan pematuhan transaksi wang ke luar negara adalah tertakluk di bawah Akta Pencegahan Pengubahan Wang Haram, Pencegahan Pembiayaan

Keganasan dan Hasil Daripada Aktiviti Haram 2021 (AMLA) [Akta 613] dan akta berkaitan yang merangkumi langkah pencegahan terhadap kegiatan pengubahan wang haram, pembiayaan keganasan, pemindahan dana melalui saluran tidak rasmi dan pengisytiharan mata wang di pintu masuk keluar negara.

AMLA dikuatkuasakan oleh agensi-agensi penguatkuasaan seperti Polis Diraja Malaysia (PDRM), Suruhanjaya Pencegahan Rasuah Malaysia (SPRM), Jabatan Kastam Diraja Malaysia (JKDM), Lembaga Hasil Dalam Negeri (LHDN), Bank Negara Malaysia (BNM) sebagai pihak berkuasa berwibawa (*competent authority*) di bawah AMLA sentiasa bersedia memberi bantuan dan sokongan kepada agensi-agensi tersebut.

Manakala aktiviti kewangan luar pesisir Malaysia dikawal selia oleh *Labuan Financial Services Authority* (Labuan FSA) melalui penguatkuasaan Akta Perkhidmatan Kewangan dan Sekuriti Labuan 2010 [Akta 704] dan Akta Perkhidmatan Kewangan dan Sekuriti Islam Labuan 2010 [Akta 705]. Aktiviti penyelarasan dan aktiviti penguatkuasaan bersama juga telah dilaksanakan terutama melalui *National Anti-Financial Crime Centre* (NFCC), penguatkuasaan dan kawalan sempadan termasuk pemantauan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN TAN KOK WAI [CHERAS]

TARIKH : 10 NOVEMBER 2021 (RABU)

SOALAN

TUAN TAN KOK WAI [CHERAS] minta **PERDANA MENTERI** menyatakan sama ada Suruhanjaya Pilihan Raya telah ditambah baik untuk menjadikannya lebih efisien, lebih inklusif, dan juga benar-benar bebas sebagai sebuah institusi untuk memastikan terdapatnya pilihan raya yang adil dan bebas di negara kita.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Suruhanjaya Pilihan Raya (SPR) merupakan sebuah Suruhanjaya yang bebas, yang mana keputusannya berlandaskan kerangka undang-undang yang sedang berkuat kuasa. Perkara 114 Perlembagaan Persekutuan pula menyatakan bahawa pelantikan Pengerusi, Timbalan Pengerusi dan Ahli SPR adalah di bawah bidang kuasa Yang di-Pertuan Agong selepas berunding dengan Majlis Raja-raja dan ini telah menunjukkan kebebasan SPR dalam melaksanakan urusan pilihan raya tanpa dicampuri oleh mana-mana pihak.

Semua warganegara yang memenuhi syarat kelayakan boleh mengambil bahagian secara inklusif dalam pilihan raya di negara ini. Hal ini adalah kerana semua warganegara yang memenuhi syarat kelayakan yang ditetapkan dibawah Perkara 119 boleh mengambil bahagian dalam pilihan raya sebagai pemilih. Selain itu, warganegara yang memenuhi syarat kelayakan seperti yang ditetapkan dalam Perkara 47 dan 48 Perlembagaan Persekutuan boleh mengambil bahagian sebagai calon dalam pilihan raya.

Kebebasan, kecekapan dan keadilan dalam menguruskan pilihan raya di negara kita boleh dilihat di pelbagai peringkat bermula dengan proses penamaan calon, proses pengundian, pengiraan sehingga pengisytiharan keputusan pilihan raya. Mereka yang tidak berpuas hati boleh mengemukakan petisyen pilihan raya dalam tempoh 21 hari dari tarikh keputusan pilihan raya itu disiarkan dalam Warta berdasarkan Seksyen 38 Akta Kesalahan Pilihan Raya 1954.

Mahkamah Tinggi mempunyai masa untuk menyelesaikan perbicaraan petisyen pilihan raya adalah tidak lewat daripada 6 bulan dari tarikh petisyen pilihan raya itu dikemukakan sebagaimana yang diperuntukkan dalam Seksyen 35A Akta Kesalahan Pilihan Raya 1954. Seksyen 36B pula memperuntukkan sesuatu rayuan terhadap keputusan seorang Hakim Pilihan Raya hendaklah didengar dan diputuskan oleh Mahkamah Persekutuan dalam masa 6 bulan dari tarikh rayuan itu dikemukakan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : YB DR. AZMAN ISMAIL [KUALA KEDAH]

TARIKH : 10 NOVEMBER 2021 (RABU)

SOALAN

DR. AZMAN ISMAIL [KUALA KEDAH] minta **MENTERI LUAR NEGERI** menyatakan pendirian Malaysia terhadap Kerajaan Junta tentera Myanmar. Apakah usaha-usaha yang telah dilakukan oleh Malaysia selaras dengan pendirian rasmi Kerajaan ini.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Kuala Kedah atas pertanyaan yang dikemukakan.

Tuan Yang di-Pertua,

2. Pada ketika ini, Malaysia mengambil pendekatan bekerjasama dengan Negara-negara Anggota ASEAN dan tidak bergerak secara bersendirian. Ini mengambil kira bahawa ASEAN mempunyai pengaruh yang lebih besar ke atas Myanmar secara kolektif supaya negara tersebut kembali ke landasan demokrasi seperti yang telah dimandatkan oleh rakyat Myanmar menerusi pilihan raya yang diadakan pada November 2020.

3. Sepertimana Dewan yang mulia ini sedia maklum, satu pertemuan di kalangan Pemimpin-pemimpin ASEAN (*ASEAN Leaders' Meeting*) telah berlangsung di Sekretariat ASEAN, Jakarta pada 24 April 2021.

4. Susulan pertemuan tersebut, Kenyataan Pengerusi ASEAN yang merangkumi dengan izin, *Five-Point Consensus* telah dikeluarkan dan dipersetujui oleh semua pihak termasuk Jeneral Kanan Min Aung Hlaing yang hadir mewakili pihak junta tentera Myanmar. *Five-Point Consensus* ini merupakan lima perkara yang dikenal pasti oleh ASEAN yang perlu dilaksanakan dalam usaha mencari jalan penyelesaian terhadap pergolakan yang berlaku di Myanmar. Antaranya, *Five-Point Consensus* berkenaan memberi mandat kepada Utusan Khas Pengerusi ASEAN mengenai Myanmar untuk mengadakan lawatan ke Myanmar bagi memudah cara dialog konstruktif bersama semua pihak berkepentingan bagi mencapai penyelesaian damai demi kepentingan rakyat Myanmar.

5. Setakat ini, lawatan tersebut masih belum dapat dilaksanakan memandangkan pihak berkuasa tentera Myanmar enggan membenarkan Utusan Khas bertemu dengan pihak-pihak berkepentingan tertentu.
6. Utusan Khas akan meneruskan usaha berbincang dengan pihak berkuasa tentera Myanmar berhubung pelaksanaan *Five-Point Consensus* ini sebagaimana diamanah oleh para Pemimpin ASEAN.
7. Keengganan pihak junta tentera Myanmar untuk membenarkan Utusan Khas melawat Myanmar dan mengadakan pertemuan dengan semua pihak yang berkepentingan termasuklah pihak anti-junta telah menyebabkan usaha Utusan Khas menemui jalan buntu.

Tuan Yang di-Pertua,

8. Malaysia menyokong penuh usaha-usaha Utusan Khas Pengerusi ASEAN berkenaan Myanmar dalam melaksanakan *Five-Point Consensus* tersebut.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD YUNUS
(HULU LANGAT)**

TARIKH : 10 NOVEMBER 2021(RABU)

SOALAN

Minta **MENTERI KANAN PERTAHANAN** menyatakan adakah Kerajaan akan membuat perolehan peluru berpandu darat ke udara jarak sederhana seperti ASTER 30 milik Singapura, dan Norwegian Advanced Surface-to-Air Missile milik Indonesia, memandangkan ruang udara negara kerap diceroboh anasir asing yang telah merendahkan maruah Malaysia.

JAWAPAN

Tuan Yang di-Pertua,

Dalam memastikan kedaulatan ruang udara negara sentiasa terpelihara, Angkatan Tentera Malaysia (ATM) melalui ketiga-tiga perkhidmatannya iaitu Tentera Darat Malaysia (TDM), Tentera Laut Diraja Malaysia (TLDM) dan Tentera Udara Diraja Malaysia (TUDM) telah dilengkapi dengan Sistem Peluru Berpandu Pertahanan Udara Jarak Dekat (*Very Short-Range Air Defence Missile System* - STARSTREAK VSHORAD) serta sistem pertahanan udara jarak dekat seperti Meriam Oerlikon 35mm dan Iglu.

Bagi memperkukuhkan lagi kedaulatan ruang udara negara daripada anasir-anasir asing yang seringkali mencerobohi ruang udara negara, TDM telahpun membuat perancangan perolehan sistem pertahanan udara iaitu *Very Short Range Air Defence* (VSHORAD) MANPAD dan sistem *Short Range Air Defence* (SHORAD) yang telah didaftarkan di dalam *Rolling Plan* Kedua (RP 2) Tahun 2022, Rancangan Malaysia Kedua Belas (RMKe-12). Manakala bagi TLDM dan TUDM telah mempunyai perancangan bagi perolehan *Surface to Air Missile* (**SAM**) untuk TLDM dan Sistem Pertahanan Udara Jarak Sederhana (*Medium Range Air Defence* - MERAD) untuk TUDM.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 10 NOVEMBER 2021 (RABU)

SOALAN

PUAN HAJAH NATRAH BINTI ISMAIL [SEKIJANG] minta **PERDANA MENTERI** menyatakan jumlah terkini generasi kedua FELDA yang telah memiliki rumah dan apakah usaha Kerajaan dalam membantu generasi kedua FELDA ini yang masih belum memiliki rumah sendiri di kawasan FELDA di seluruh negara.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Lembaga Kemajuan Tanah Persekutuan (FELDA) telah ditubuhkan pada 1 Julai 1956 di bawah Ordinan Kemajuan Tanah 1956 (Akta 474) untuk pembangunan tanah dan penempatan semula (dibawah GSA-Group Settlement Areas - Akta 530) dengan objektif pembasmian kemiskinan melalui penanaman tanaman minyak sawit dan getah. Antara fungsi FELDA adalah untuk melaksanakan projek-projek pembangunan tanah dan aktiviti pertanian, perindustrian dan komersial sosial ekonomi.

2. Pewujudan FELDA telah menepatkan 116,638 peneroka di 317 rancangan di seluruh Malaysia. Setelah 65 tahun FELDA beroperasi, dianggarkan populasi Generasi Baharu FELDA pewaris kepada peneroka adalah sebanyak 2,084,087 orang yang masih mendiami rumah ibu bapa di rancangan dan sebahagiannya duduk di luar rancangan.
3. Sehingga kini, seramai 26,985 generasi kedua FELDA telah menerima manfaat perumahan melalui beberapa program perumahan untuk warga FELDA, antaranya Projek Perumahan Generasi Baharu FELDA (PGBF) sebanyak 2,020 unit, Perumahan Warga FELDA (PWF) sebanyak 3,097 unit, Projek Perumahan 1 FELDA (P1F) sebanyak 84 unit dan projek FELDAJAYA sebanyak 196 unit.
4. Dua isu utama mengenai penyediaan perumahan untuk generasi kedua FELDA adalah tanggungan subsidi oleh Kerajaan yang tinggi serta ketidakupayaan generasi kedua FELDA untuk mendapatkan pembiayaan bagi pembelian rumah tersebut. Bagi menanganinya, Kerajaan akan memperkenalkan model pembangunan perumahan berasaskan konsep bina sendiri. Melalui model ini, generasi kedua FELDA akan ditawarkan lot-lot kediaman pada harga mampu milik dan seterusnya dibina sendiri berdasarkan reka bentuk standard yang disediakan.
5. Sementara itu, FELDA turut mengadakan perjanjian persefahaman (MoU) dengan Agrobank bagi membolehkan generasi kedua FELDA yang ingin membeli kediaman di bawah PGBF menikmati beberapa kelonggaran syarat termasuk kadar faedah lebih rendah serta kadar pembiayaan lebih tinggi iaitu 110% daripada harga rumah dengan nilai maksimum RM300,000.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : DATUK SERI SHAMSUL ISKANDAR
@ YUSRE BIN MOHD AKIN
[HANG TUAH JAYA]**

TARIKH : 10 NOVEMBER 2021 (RABU)

SOALAN

DATUK SERI SHAMSUL ISKANDAR @ YUSRE BIN MOHD AKIN [HANG TUAH JAYA] minta **KEMENTERIAN PERDAGANGAN ANTARABANGSA DAN INDUSTRI** menyatakan apakah analisis atau kaedah yang dilakukan oleh Kementerian untuk memastikan pelaburan-pelaburan yang masuk ke dalam negara berkualiti tinggi dan mampu membantu menjana ekonomi berimpak tinggi pasca COVID-19.

JAWAPAN

Tuan Yang di-Pertua,

1. Persekitaran ekonomi global pasca COVID-19 adalah sangat mencabar dan telah memberi kesan terhadap ekonomi utama di seluruh dunia. Meskipun berhadapan dengan banyak cabaran, Kerajaan melalui Kementerian Perdagangan Antarabangsa dan Industri (MITI) dan Lembaga Pembangunan Pelaburan Malaysia (MIDA) komited untuk memastikan Malaysia terus kekal sebagai lokasi yang mesra pelabur dan pelaburan yang masuk ke dalam negara adalah berkualiti tinggi yang mampu membantu menjana ekonomi berimpak tinggi pasca COVID-19.
2. Malaysia kini tidak lagi menerima pelaburan yang mempunyai elemen *low-end assembly-type operations* dan *labour-intensive projects*. Kerajaan sedar akan keperluan dan kepentingan untuk membangunkan sektor-sektor industri yang berteraskan teknologi tinggi dan mempunyai

nilai tambah terhadap ekosistem industri di negara ini sebagai usaha untuk terus mengekalkan reputasi Malaysia sebagai sebuah negara perindustrian yang kompetitif bagi pelaburan syarikat-syarikat global terkemuka.

3. Bagi tempoh **Januari sehingga Jun 2021**, jumlah pelaburan yang diluluskan dalam ekonomi merangkumi sektor **perkilangan, perkhidmatan dan utama adalah berjumlah RM107.5 bilion** iaitu peningkatan sebanyak 69.8 peratus berbanding dengan tempoh yang sama tahun lalu (RM63.3 bilion). Sektor perkilangan adalah penyumbang terbesar kepada nilai pelaburan yang diluluskan iaitu sebanyak RM66.9 bilion, diikuti sektor perkhidmatan dengan pelaburan sebanyak RM34.1 bilion dan sektor utama dengan pelaburan berjumlah RM6.5 bilion. Pelaburan yang diluluskan dalam tempoh ini membabitkan 2,110 projek dan dijangka akan mewujudkan 44,994 peluang pekerjaan baharu.

4. Daripada jumlah pelaburan yang diluluskan dalam ekonomi, pelaburan langsung asing (FDI) menyumbang sebanyak RM62.5 bilion iaitu lonjakan sebanyak 214.9 peratus berbanding dengan tempoh yang sama tahun lalu. Malah, lonjakan FDI adalah lebih tinggi dalam sektor perkilangan iaitu 223.1 peratus.

5. Peningkatan FDI pada separuh pertama 2021 membuktikan Malaysia kekal menjadi destinasi pelaburan utama meskipun negara masih berdepan dengan cabaran akibat pandemik yang melanda dunia.

Tuan Yang di-Pertua,

6. Dalam usaha untuk memastikan negara kita terus menerima pelaburan yang berkualiti tinggi, MITI dan MIDA sentiasa mengadakan *townhall session* bersama dewan perniagaan dan komuniti perniagaan antarabangsa seperti *American-Malaysian Chamber of Commerce (AMCHAM)*, *Malaysian-German Chamber of Commerce (MGCC)*, *British-Malaysian Chamber of Commerce (BMCC)*, *Malaysian French Chamber of Commerce and Industry (MFCCI)*, *Japanese Chamber of Trade & Industry, Malaysia (JACTIM)*, Korea Trade Promotion Investment Agency (KOTRA) dan *EU-Malaysia Chamber of Commerce and Industry (EUROCHAM)*.

7. Sesi *townhall* ini adalah bertujuan untuk mendapatkan maklum balas dan pandangan daripada komuniti perniagaan antarabangsa dan wakil-wakil syarikat mengenai prestasi dan operasi perniagaan syarikat dalam situasi pandemik COVID-19. Maklum balas dan cadangan yang dikemukakan oleh komuniti ini telah digunakan untuk menambahbaik usaha Kerajaan dalam menangani cabaran yang dihadapi pihak industri dan merangka polisi penggalakan pelaburan pasca COVID-19 yang bersesuaian dan tepat.

8. Sesi *townhall* ini juga digunakan untuk mengoptimumkan jaringan komunikasi dewan perniagaan antarabangsa dalam menyampaikan hasrat Kerajaan untuk menarik syarikat-syarikat multinasional yang berteknologi tinggi agar terus memilih Malaysia sebagai destinasi pelaburan mereka.

Tuan Yang di-Pertua,

9. Selain itu, Jawatankuasa Nasional mengenai Pelaburan (*National Committee on Investment* - NCI) yang telah ditubuhkan di bawah MIDA pada Mei 2010 juga merupakan platform tunggal untuk menimbangkan projek pelaburan dalam sektor perkilangan dan perkhidmatan tertentu di Malaysia, secara masa nyata (*real-time*) bagi mengurangkan kerenah birokrasi dan mempercepatkan kelulusan projek-projek yang disasarkan.

10. Bagi menambah baik proses kelulusan projek pelaburan di Malaysia, mesyuarat Jemaah Menteri pada 8 Mei 2019 telah bersetuju agar NCI diperkasakan sebagai jawatankuasa tunggal untuk menimbang permohonan insentif cukai dan geran di peringkat nasional yang melibatkan semua agensi-agensi penggalakan pelaburan di seluruh Malaysia.

11. NCI yang telah diperkasakan ini dipengerusikan secara bersama oleh MITI dan Kementerian Kewangan (MOF), dan akan mempertimbang projek pelaburan yang dikendalikan oleh agensi-agensi penggalakan pelaburan lain di peringkat koridor wilayah serta kementerian atau jabatan atau agensi lain seperti Perbadanan Pembangunan Industri Halal (HDC), Malaysia Digital Economy Corporation Sdn. Bhd. (MDEC), Malaysian Bioeconomy Development Corporation Sdn. Bhd. (Bioekonomi) dan Kementerian Pertanian dan Industri Asas Tani (MOA).

12. Dalam memastikan projek-projek pelaburan yang diluluskan dapat menyumbang kepada pembangunan ekosistem pelaburan, NCI akan menetapkan syarat-syarat tertentu di dalam kelulusan, antara lain, yang meliputi pelaburan harta tetap, perbelanjaan operasi tahunan, nilai ditambah bagi keluaran atau aktiviti syarikat dan jumlah kakitangan di peringkat pengurusan, teknikal dan penyeliaan. Selain itu, bagi menjamin peluang pekerjaan kepada rakyat tempatan, NCI turut menetapkan syarat jumlah guna tenaga sepenuh bagi rakyat Malaysia sekurang-kurangnya 80 peratus. Untuk menggalakkan pemindahan teknologi dan penjana bakat tempatan berkemahiran tinggi bagi projek-projek tertentu, NCI turut menetapkan syarat kolaborasi di antara pihak industri dengan institusi pengajian tinggi atau penyelidikan tempatan.

Tuan Yang di-Pertua,

13. Mulai tahun 2012, NCI telah mengguna pakai pendekatan Analisis Kos-Faedah (*Cost-Benefit Analysis – CBA*) sebagai mekanisme penilaian kuantitatif dan kualitatif untuk setiap permohonan bagi mendapatkan insentif fiskal dan bukan fiskal. Pendekatan CBA ini telah ditambah baik dari semasa ke semasa bagi memastikan pelaburan yang diluluskan adalah benar-benar berkualiti. Antara indikator bagi projek berkualiti adalah projek yang berintensifkan modal, pengetahuan, teknologi dan bernilai tambah tinggi serta kesan limpahan (*spin-off effects*) yang tinggi kepada ekonomi negara.

14. Secara kesimpulannya, meskipun pandemik COVID-19 telah mengubah lanskap pelaburan global, MITI bersama-sama agensi di bawahnya akan terus komited dalam melaksanakan pelbagai langkah strategik dan proaktif bagi memastikan pelaburan berkualiti dan berimpak tinggi dibawa masuk selaras dengan matlamat Kerajaan untuk mewujudkan pekerjaan berpendapatan tinggi, memperluas rangkaian domestik dan mewujudkan ekosistem pelaburan dan perniagaan yang kondusif dan dinamik, di samping menjana ekonomi mampan pasca COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN RAMKARPAL SINGH A/L KARPAL
SINGH [BUKIT GELUGOR]**

TARIKH : 10 NOVEMBER 2021 (RABU)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **PERDANA MENTERI** menyatakan sama ada Kerajaan akan membentangkan Rang Undang-Undang Anti-Lompat Parti atau undang-undang yang seumpamanya seperti yang dijanjikan oleh Perdana Menteri dan sekiranya ya, sama ada ia akan dibentangkan, diluluskan dan mula berkuatkuasa sebelum pilihan raya yang akan datang.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Cadangan untuk mewujudkan suatu peruntukan undang-undang berkaitan anti-lompat parti merupakan salah satu daripada Agenda Transformasi Kerajaan yang bertujuan memastikan reformasi dan pembaharuan dalam pentadbiran Kerajaan khususnya peranan institusi Parlimen akan terus diperkasakan. Dalam hal ini, Kerajaan komited untuk

memastikan undang-undang berkaitan anti-lompat parti yang akan digubal dapat melindungi hak rakyat negara ini.

Selaras dengan perkara ini dan mengambil kira kewajaran untuk pembentangan dilaksanakan secepat mungkin, Kerajaan akan memastikan sesi libat urus yang menyeluruh diadakan bersama pihak berkepentingan, badan bukan Kerajaan, ahli Parlimen Kerajaan dan Pembangkang serta rakyat agar Rang Undang-Undang baharu yang diperkenalkan mendapat sokongan semua pihak. Sesi libat urus ini juga akan memastikan hala tuju dan parameter gubalan undang-undang ini dapat ditetapkan serta tidak bertentangan dengan Perlembagaan Persekutuan atau undang-undang lain yang berkuat kuasa termasuk di peringkat negeri.

Pada ketika ini, Kerajaan sedang mengkaji undang-undang yang digunakan di peringkat Negeri, termasuk kes Mahkamah yang berlaku di beberapa negeri melibatkan pelaksanaan perundangan berkaitan lompat parti. Selain itu, Kerajaan turut meneliti model perundangan beberapa buah negara seperti India, Singapura, New Zealand dan United Kingdom melibatkan peruntukan lompat parti. Dapatan daripada kajian ini akan dibincangkan melalui sesi libat urus bi-partisan yang dijangka diadakan pada November 2021.

Dalam hal ini, semua dapatan daripada kajian undang-undang, model perundangan negara luar dan sesi libat urus dengan pihak berkepentingan termasuk bersama bi-partisan akan dianalisa dan dimuktamadkan sebagai parameter gubalan Rang Undang-Undang Anti-Lompat Parti atau undang-undang yang seumpamanya untuk sesi pembentangan yang dijangka pada sidang Parlimen tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN TUN
DR. MAHATHIR [JERLUN]**

TARIKH : 10 NOVEMBER 2021 (RABU)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **PERDANA MENTERI** menyatakan apakah yang dilakukan oleh Kerajaan bagi menghidupkan semula dasar Malaysian Incorporated, memandangkan Rancangan Malaysia Ke-12 menetapkan bahawa pihak swasta akan memainkan peranan yang penting dalam kemajuan negara.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Dasar Persyarikatan Malaysia atau dengan izin, *Malaysia Incorporated Policy* telah diperkenalkan pada tahun 1981. Melalui dasar ini, sektor swasta akan melaksanakan aktiviti perdagangan dan ekonomi. Manakala sektor awam menyediakan dasar utama dan perkhidmatan sokongan yang kondusif bagi kemajuan aktiviti perdagangan dan ekonomi.

2. Bagi menyokong kesinambungan Dasar Persyarikatan Malaysia, Kerajaan telah melancarkan Dasar Penswastaan pada tahun 1983 dan Garis Panduan Mengenai Penswastaan pada tahun 1985 yang mengariskan secara terperinci mengenai objektif dasar, kaedah penswastaan dan jentera pelaksanaanya. Selanjutnya, pada tahun 1991, Kerajaan telah mengeluarkan Pelan Induk Penswastaan menjelaskan dasar dan strategi program penswastaan.

3. Seterusnya, Kerajaan mulai tahun 2009 telah memperkenalkan pendekatan Kerjasama Awam Swasta atau dengan izin, *Public Private Partnership* (PPP) bagi mengukuhkan jalinan kerjasama strategik antara sektor awam dan swasta dalam mempergiatkan usaha-usaha merencanakan pelaburan swasta dalam pembangunan ekonomi negara.

4. Dalam Rancangan Malaysia Kedua Belas (RMKe-12), sektor swasta serta pertubuhan masyarakat sivil (CSO) akan terus menjadi rakan pembangunan utama kepada Kerajaan selaras dengan pendekatan keseluruhan negara atau dengan izin, '*whole-of-nation approach*' dan akan terus memainkan peranan yang penting dalam merealisasikan matlamat Wawasan Kemakmuran Bersama 2030 (WKB 2030) dan Agenda 2030. Ekosistem yang menyokong penyertaan sektor swasta dalam pembangunan akan terus ditambah baik seperti memudahkan cara peraturan kawal selia serta meningkatkan libat urus dan konsultasi dengan sektor swasta dan CSO dalam merangka dasar. Penyampaian perkhidmatan awam akan diperkukuh bagi memudahkan urusan menjalankan perniagaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB DATUK ROZMAN BIN DATUK HAJI ISLI
(LABUAN)**

TARIKH : 10 NOVEMBER 2021 (RABU)

SOALAN

DATUK ROZMAN BIN DATUK HAJI ISLI [LABUAN] minta **MENTERI KANAN KERJA RAYA** menyatakan adakah Kementerian sedar akan keperluan membina bulatan di Kampung Sungai Lada, Jalan Kinabenua, dan Kampung Lajau memandangkan kawasan ini sering kali berlaku kemalangan dan sudah ada kes kematian.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya (KKR) telah melaksanakan program menaiktaraf infrastruktur keselamatan jalan raya di sepanjang jalan persekutuan (*Program Menaiktaraf Infrastruktur Keselamatan Jalan Raya*) khususnya di lokasi-lokasi yang dilaporkan kerap berlaku kemalangan jalan raya termasuklah di Wilayah Persekutuan Labuan.

Melalui program ini, Jabatan Kerja Raya menjalinkan kerjasama yang erat dengan pihak Polis Diraja Malaysia (PDRM) bagi memperolehi maklumat kemalangan jalan raya. Butiran terperinci setiap kemalangan raya di Jalan Persekutuan termasuklah punca-punca kemalangan dikongsi bersama oleh PDRM kepada JKR pada setiap bulan agar maklumat tersebut dapat diteliti dan dianalisa bersama-sama dengan data bancian lalu lintas serta sesi audit keselamatan jalan. Cadangan skop kerja naiktaraf bagi jalan yang terlibat di bawah program *blackspot* ini adalah berdasarkan analisa data kemalangan, kajian lalu lintas dan audit keselamatan jalan tersebut.

Untuk makluman Ahli Yang Berhormat, Kementerian Kerja Raya melalui JKR telah melaksanakan kajian lalu lintas di lokasi-lokasi yang dibangkitkan. Dapatan kajian mendapati bahawa menaiktaraf persimpangan sedia ada kepada bulatan masih tidak diperlukan pada masa ini kerana isipadu lalu lintas belum mencapai waran kepada pembinaan bulatan. Namun demikian, Kementerian sentiasa menjalankan pemantauan dan kajian lalulintas secara berterusan untuk memastikan keselamatan pengguna jalan raya. Lanjutan itu, KKR telah melaksanakan beberapa tindakan selari dengan tujuan tersebut seperti berikut:

1. Bagi simpang tiga Jalan Bebuloh ke Jalan Ranche-Ranche Bebuloh (yang dikenali oleh penduduk Labuan sebagai Jalan Kinabenua), KKR telah melaksanakan kerja menaiktaraf fasiliti keselamatan jalan meliputi

pemasangan lampu jalan dan garisan jalan pada tahun 2019 dengan peruntukan berjumlah RM331,090.00. Berdasarkan rekod, tiada kemalangan yang dilaporkan di persimpangan ini sejak kerja-kerja naiktaraf tersebut siap dilaksanakan.

2. Bagi simpang tiga Jalan Pohon Batu – Jalan Tanjung Aru (yang dikenali simpang di Kampung Lajau), Kementerian ini telah menyenaraikan cadangan Menaiktaraf Simping Tiga Di Jalan Pohon Batu-Jalan Tg. Aru, W.P. Labuan sebagai senarai keutamaan Kementerian kepada Agensi Pusat untuk pertimbangan di bawah Rolling Plan 2, RMKe-12. Bagi tindakan proaktif, JKR telah mendirikan papan tanda lalulintas supaya pengguna jalan raya lebih peka dan berhati-hati apabila melalui jalan tersebut. Selain itu juga, sesi libat urus bersama wakil penduduk di kampung terlibat diadakan bagi memberi penerangan kepada pengguna jalan raya khususnya penduduk kampung berhampiran (Kampung Lajau dan Ganggarak) agar mematuhi papan tanda dan amaran lalulintas.

3. Bagi simpang di Sungai Lada, rekabentuk geometrik di jalan tersebut didapati teratur dan isipadu lalu lintas masih rendah. Mengikut rekod kemalangan bagi tahun 2019-2021, hanya terdapat dua kemalangan jalan raya yang dilaporkan di Sungai Lada. Walau bagaimanapun, JKR akan sentiasa menjalankan pemantauan dan kajian lalulintas secara berterusan untuk memastikan keselamatan pengguna jalan raya.

Untuk makluman Ahli Yang Berhormat, KKR akan terus komited dan sentiasa melaksanakan pemantauan di lokasi – lokasi berisiko berlaku kemalangan di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 10 NOVEMBER 2021 (RABU)

SOALAN

DATO' HAJI MAHFUZ BIN HAJI OMAR [POKOK SENA] minta **PERDANA MENTERI** menyatakan apakah langkah-langkah yang diambil untuk menambah baik *ranking* indeks persepsi rasuah global oleh Transparency International di mana Malaysia berada pada ranking 61 dengan skor 47 pada tahun 2018, kemudian ranking 51 dengan skor 53 pada tahun 2019 dan ranking 57/180 dengan skor 51/100 pada tahun 2020.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, skor dan kedudukan Malaysia dalam Indeks Persepsi Rasuah (*Corruption Perception Index*, CPI) yang dikeluarkan oleh Transparency International untuk tahun 2020 adalah 51/100 dengan kedudukan pada tangga 57 daripada 180 negara. Skor ini telah menurun berbanding pencapaian negara pada tahun 2019 iaitu skor sebanyak 53 pada tangga 51 daripada 180 negara.

Berdasarkan 9 tinjauan (*survey*) dan penilaian CPI Malaysia bagi tahun 2020, didapati sebanyak 3 telah mengalami penurunan agregat skor iaitu *IMD World Competitiveness Center World Competitiveness*, *Political and Economic Risk Consultancy Asian Intelligence 2020* dan *Varieties of Democracy (V-Dem) 2020*, manakala 1 tinjauan menunjukkan peningkatan iaitu *World Justice Project Rule of Law Index Expert Survey 2020*.

Ketiga-tiga agregat skor yang telah turun tersebut jelas menunjukkan bahawa persepsi rasuah tidak semata-mata dipengaruhi oleh jumlah kes tangkapan rasuah dan jumlah penguatkuasaan yang meningkat. Faktor lain yang turut diambil kira adalah komitmen integriti pemimpin kerajaan, amalan tadbir urus baik kerajaan, komitmen Ketua Jabatan dalam memerangi rasuah dalam organisasi, demokrasi, ketelusan, kecekapan sistem penyampaian kerajaan, keberkesanan pelaksanaan polisi kerajaan serta pemantapan mekanisme semak dan imbang (*check and balance*) bagi menambahbaik akauntabiliti Kerajaan yang secara tidak langsung memberi kesan kepada daya saing dan ekonomi negara.

Sehubungan itu, Kerajaan akan sentiasa meneruskan usaha untuk memperbaiki kedudukan negara dalam CPI melalui pelaksanaan inisiatif-inisiatif yang digariskan dalam Pelan Antirasuah Nasional (NACP) 2019-2023 melibatkan 6 bidang keutamaan iaitu tadbir urus politik, pentadbiran

sektor awam, perolehan awam, perundangan dan kehakiman, penguatkuasaan undang-undang dan tadbir urus korporat. Usaha ini merangkumi pembaharuan dasar, pembaharuan undang-undang dan pembaharuan institusi untuk memastikan amalan prinsip tadbir urus baik, ketelusan, akauntabiliti, kecekapan dan keberkesanan dalam kalangan sektor awam, swasta termasuk sektor politik antaranya seperti berikut:

- (i) Indeks Tadbir Urus Malaysia (MGI) diperkenalkan sebagai suatu ukuran bagi menilai tahap tadbir urus pentadbiran negara. Langkah sedang diambil untuk mengadakan kajian komprehensif bagi mewujudkan MGI serta mengadakan sesi libat urus bersama pihak berkepentingan bagi mengenal pasti indikator pengukuran tahap amalan dan pelaksanaan tadbir urus baik dalam pelbagai sektor berkaitan;
- (ii) Pelaksanaan kajian berhubung penggubalan rang undang-undang baharu berkaitan sumbangan dana politik dan diberi tempoh masa bermula Januari 2021 hingga Disember 2022 bagi mengawalselia sumbangan politik demi memastikan pembiayaan politik yang lebih telus dan berintegriti;
- (iii) Akta Ombudsman Malaysia diwujudkan dengan segera bagi memastikan pengurusan aduan agensi awam yang lebih telus dan berkesan;
- (iv) Meningkatkan usaha untuk mengadaptasi *Integrity Pact* selaras dengan standard antarabangsa. Perkara ini sedang dalam kajian oleh Kementerian Kewangan dan Suruhanjaya Pencegahan Rasuah Malaysia selaras dengan keputusan Mesyuarat JKKMAR Siri 14 Tahun 2021 pada 19 April 2021; dan
- (v) Laporan dan komunikasi kepada umum secara konsisten dan berkala tentang usaha-usaha Kerajaan dalam pengukuhan tadbir urus, integriti dan antirasuah serta kes-kes berprofil tinggi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN TUN
MAHATHIR [JERLUN]**

TARIKH : 10 NOVEMBER 2021 (RABU)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **PERDANA MENTERI** menyatakan adakah Kerajaan berhasrat untuk mewujudkan Mahkamah Khas untuk membicarakan kes-kes berprofil tinggi. Jika tidak, kenapa.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, pada masa ini tidak ada sebarang cadangan untuk menubuhkan Mahkamah Khas untuk membicarakan kes-kes berprofil tinggi. Mahkamah sedia ada boleh mengendalikan semua kes- kes tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN TEH KOK LIM [TAIPING]

TARIKH : 10 NOVEMBER 2021 (RABU)

SOALAN

TUAN TEH KOK LIM [TAIPING] minta **PERDANA MENTERI** menyatakan rancangan Kerajaan dalam usaha menangani rasuah yang merupakan musuh utama negara.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, secara dasarnya Kerajaan telah memperkenalkan Pelan Anti Rasuah Nasional 2019-2023 yang memberi penekanan kepada enam bidang keutamaan yang berisiko tinggi rasuah iaitu tadbir urus politik, pentadbiran sektor awam, perolehan awam, perundangan dan kehakiman, penguatkuasaan dan tadbir urus korporat yang dijadikan sebagai strategi utama dengan 82 inisiatif pencegahan rasuah di peringkat nasional.

Daripada 82 inisiatif ini, SPRM sendiri menerajui 11 inisiatif pencegahan rasuah dengan sokongan beberapa agensi lain termasuklah tindakan memperkasakan Suruhanjaya Pencegahan Rasuah Malaysia serta membuat kajian terhadap beberapa peruntukan undang-undang yang berkaitan dengan pencegahan rasuah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 10 NOVEMBER 2021 (RABU)

SOALAN

TUAN WONG LING BIU [SARIKEI] minta **PERDANA MENTERI** menyatakan berapa jumlah peruntukan akan dibagi untuk Pilihan Raya Sarawak yang akan datang.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, kos bagi pelaksanaan Pilihan Raya Umum (PRU) Dewan Undangan Negeri (DUN) Sarawak yang ke-12 adalah berjumlah RM150 juta yang merangkumi perolehan peralatan pilihan raya, pembangunan ICT, logistik, elaun petugas dan keperluan-keperluan lain yang berkaitan termasuk keperluan peralatan COVID-19 dan mengambil kira pelaksanaannya mengikut garis panduan pencegahan COVID-19 bagi pelaksanaan pilihan raya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DATO' SRI HAJAH ROHANI BINTI HAJI ABDUL
KARIM [BATANG LUPAR]**

TARIKH : 11 NOVEMBER 2021 (KHAMIS)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **PERDANA MENTERI** menyatakan apakah langkah yang diambil oleh Jabatan Perangkaan Malaysia bagi mempergiatkan banci di kawasan yang mana peratusan penduduk telah dibanci sangat rendah seperti di beberapa daerah di Sarawak dan Sabah iaitu Betong (25.4 peratus), Ranau (32.1 peratus) dan Tenom (33.4 peratus) setakat awal Oktober lalu?

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Berdasarkan data operasi Banci 2020, peratusan penduduk dibanci bagi Sabah berbanding anggaran penduduk 2020 adalah 93.0 peratus. Pembancian merangkumi mod pembancian dalam talian (9.2%) dan bersemuka (83.8 %). Penduduk Sabah yang telah dibanci adalah 3.6 juta orang berbanding Banci 2010 (3.1 juta) dengan Purata Kadar Pertumbuhan Tahunan (CAGR) penduduk 1.5 peratus. Bilangan Tempat Kediaman adalah 751.6 ribu berbanding 576.8 ribu (Banci 2010).
2. Manakala bagi Sarawak peratusan penduduk dibanci berbanding anggaran penduduk 2020 adalah 81.6 peratus merangkumi mod pembancian dalam talian (15.5%) dan bersemuka (66.2%). Penduduk Sarawak yang telah dibanci adalah 2.3 juta orang berbanding Banci 2010 (2.4 juta) dengan Purata Kadar Pertumbuhan Tahunan (CAGR) penduduk -0.4 peratus. Bilangan Tempat Kediaman adalah 755.0 ribu berbanding 594.5 ribu (Banci 2010) dengan CAGR 2.7 peratus.
3. Sehingga 8 November 2021, pembancian yang telah selesai di daerah Ranau adalah sebanyak 90.1 peratus dan daerah Tenom di Sabah adalah sebanyak 77.3 peratus daripada anggaran penduduk. Sementara itu, daerah Betong telah mencapai pembancian sebanyak 54.6 peratus daripada anggaran penduduk.
4. Pembancian di beberapa daerah seperti di Sarawak dan Sabah iaitu Betong, Ranau dan Tenom agak rendah daripada daerah lain kerana operasi kerja luar di kawasan tersebut terpaksa ditangguhkan disebabkan peningkatan kes COVID-19. Penangguhan di kawasan itu jua atas nasihat daripada Pejabat Daerah, Majlis Keselamatan Negara dan Kementerian Kesihatan Malaysia. Bagi melengkapkan banci di kawasan tersebut, Jabatan Perangkaan Malaysia telah mengambil langkah-langkah seperti:

- i. Pertambahan kekuatan anggota Personel Mystep (PMS) di samping dibantu oleh pegawai tetap untuk melaksanakan operasi lapangan;
- ii. Membuat semakan semula di kawasan bersasar;
- iii. Membuat semakan menggunakan Data Pentadbiran dari agensi yang berkaitan;
- iv. Kerjasama berterusan dengan Kerajaan Negeri seperti Pegawai Daerah dan Ketua Komuniti setempat; dan
- v. Meningkatkan publisiti Banci Malaysia 2020 kepada masyarakat bagi Daerah berkenaan dan memberi penekanan untuk memberikan maklumat yang tepat dan lengkap.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK MOHAMADDIN BIN KETAPI
[LAHAD DATU]**

TARIKH : 10 NOVEMBER 2021 (RABU)

SOALAN

Datuk Mohamaddin bin Ketapi [Lahad Datu] minta **MENTERI ALAM
SEKITAR DAN AIR** menyatakan jumlah kapasiti loji air di Lahad Datu
ketika ini dan adakah kerajaan bercadang untuk menambah bilangan loji
air, lokasi dan jumlah kos yang terlibat.

JAWAPAN

Tuan Yang di-Pertua,

1. Untuk makluman Ahli Yang Berhormat pada ketika ini terdapat 4 bilangan loji air di Lahad Datu dengan kapasiti rekabentuk berjumlah 63 juta liter sehari (JLH) dengan jumlah purata pengeluaran semasa loji adalah sebanyak 75JLH. Ini bermakna tiada rizab margin air bersih di Daerah Lahad Datu dan keadaan ini boleh mengakibatkan gangguan bekalan air. Untuk itu bagi mengatasi masalah ini; Kerajaan Persekutuan telah meluluskan peruntukan secara pinjaman berjumlah RM270 juta bagi melaksanakan pembinaan loji baru di Segama. Pembinaan ini melibatkan skop kerja yang berikut:

- (i) Pembinaan muka sauk baru di sungai Segama;
- (ii) Loji air baru dengan kapasiti 60JLH;
- (iii) Pembinaan tangkiimbangan berkapasiti 22.5 juta liter (JL);
- (iv) Pembinaan tangki perkhidmatan berkapasiti 6JL; dan
- (v) Pemasangan paip air pelbagai saiz sepanjang 28 km.

2. Projek ini telah dimulakan pada 2 Mac 2020 dan tarikh siap asalnya adalah pada 2 Mac 2023. Namun disebabkan isu-isu pelaksanaan PKP ianya telah dilanjutkan sehingga 24 Jun 2023. Kemajuan kerja yang dijadualkan pada ketika ini adalah 8.64% berbanding dengan kemajuan sebenar sebanyak 3.38%. Ini bermakna ianya telah mengalami kelewatan sebanyak -5.26%. Kerja-kerja dijangka dapat berjalan lancar selepas sekatan PKP ini dilonggarkan.

Sekian, terima kasih.